

Polota Loum sos dla yu ilimale hamili Loum

Loum buka ya: dulu koko

Polota ala Loum mo dla potlalo halemama yu iye ilipo Loum so dla hamiyo. Yu ilimale dulu hema mikadepe dlowe ya: dulu kokoye ilimaiyo. Epammama ya:tapo Kelisota oko halë mate epo Godta bokotiyapo malamale mate epo mikadepe dlowe koko mate epo pasakalo halowe koko mate ilalimaiyo. Epame batalimale koko dla ma ilimaiyo. Epame Yu so ikadepe mate epo po-Yu so mateta mikadepe dle tle ma-hatlope depo ha:ha: koko mape ilimaiyo.

1 ¹Na:ye Polo, Yesu Keliso ya: oko oplamipo. Epedeme Godtapo na:ye tane dle oplami hi hamipame na: watle ya: tle pua ka:dle yu atlamsela:lepo depame ma sauwapo. ²Epapedeme mo-powataliya Godtapo ka:dle yu iye opata dallepo depame ya: tle yu hapame molo atlamalalo so opa dla hamimama yu itiyapo himiwapo. Epedeme yu iye God yu buka dla me-ilimale halapo. ³⁻⁴Epapedeme ka:dle yu iye Yami Yesu Keliso kokoye apopo. Yesu Keliso eye di Lodpo. Epele dulu dla opatapo ta:lamo tiyama tle Yesu Keliso natilati ya:ye Deibidi elele halë oplami haluwapo. Amasiyama ma Soko tle natilati ya:ye God Yami ikadepe haluwapo. Adipalati, Godtapo ya:ye itiyamale mate powale tle ta:duwapo. ⁵Epedeme Godtapo na: sikemte malamama Keliso tle na: watle tane dle oko ka:piye hamiwapo, po-Yu so opa hapulomatapo na: tle Keliso dla mikadepe depame salladepo siyamelepo depame. Epapele koko tle na:tapo Keliso yilo ya: oko iye hapo. ⁶Epame wua: mape Godtapo wua:ye Yesu Keliso dulu dla ha:ha:lepo depame mo-sisilamuwapo.

⁷Epapedeme na: yu ilimale iye Godtapo bokotiyapo malamale opa Loum mo dla ha:ha:lalo so wua: dla hamima. Godtapo wua:ta ya: opa depo ha:ha:lepo depame ma-sisilamuwapo. Epedeme di A God mate epo di Lod Yesu Keliso mate yia:ta bokotiyapo malamale mate epo sadle mateta wua: mate hallepe.

**Polota Loum mo so natila puluwedeme
sikemte solotamale himhalale koko**

⁸Epedeme mo hapuloma dulu dla opa hapulomatapo wua:ta mikadepe dle kokoye ma-dlalemtauwapo. Epapedeme na:tapo Yesu Keliso tle wua:ta hapuloma yilo God dla siyele yu atlemde. ⁹Epame God ma me-ya:malamana, na:ta alila hapuloma wua: yilo inoma sumale yu himhala kokoye. God eye na:tapo na: dupa dulu tle sikemte malahalemama ka:dle yu Yami kokoye atlamsela:po. ¹⁰Epedeme na:ta wua: natila puluwe koko dla inoma sumale yu mate God dla dalla natidemhalema. Amasiyama epapele dla Godta solotamelepiye, eta na:ta wua: natila puluwepo. ¹¹Adipalati, na:tapo Soko tiyama tle wua: gadlowedeme wua: natila puluweye sikemte solotama. Epame wua:tapo Lod dulu dla itiyamale mate ha:ha:lepo depame. ¹²Epedeme na:ta atlama kokoye ipapena. Na: solotama, na:ta mikadepe dle kokotapo wua:ye gadlepo depame. Epame asiyama wua: mape wua:ta mikadepe dle kokotapo na:ye gadlepo depame. ¹³Epapedeme namkadulo, wua: malamaiya, na: sikemte solotamde, wua:ye puame natilowedeme. Amasiyama koko haletapo na:ta wua: puame natilowe apiye himomelemhalemduwapo. Epapele dulu dla na:tapo po-Yu so opa opi gadle himiwaye, epammama na: sikemte solotamde, na:tapo wua:ta mikadepe dle kokotapo teta:lepo depame gadle epapele himilowe.

¹⁴Epedeme na: dla solotamale pato elema, mo patoto dulu dla ha:ha:lalo so dla epo dalupa dulu dla ha:ha:lalo so dla ka:dle yu atloweye. Epame koko malamale so dla epo koko yeitamale so dla ka:dle yu atlowe ma solotamale pato elema. ¹⁵Epapele koko tle na: sikemte solotama, Loum mo edla puame ka:dle yu wua: dla atlamolowedeme.

¹⁶Epedeme na: ka:dle yu iye di dla hamhetama. Adipalati, ka:dle yu iye Godta itiyamalepo. Epedeme Godtapo ka:dle yu itle ya: dla mikadepe dle so pasakaloye gademhalapo. Epammama ya:tapo Yu so tatile gadepame matle po-Yu so mape gademhalapo. ¹⁷Epapedeme ka:dle yuta God mila:pi tle ullu pa:po hallowe kokoye botomastamhalapo. Epapele dulu dla ullu pa:po hallowe koko iye isikimi mikadepe dle koko tle ammhalapo. Ame adipalati, God yu bukata epo atlapo,

“Godta ullu pa:talo so demhala sotapo mikadepe dle tle pasakalo hallowe hamha:ha:po.”

Godta siyaladleta opa dla pua koko

¹⁸Epedeme Godtapo Pepele dimo tle ya:ta siyaladle kokoye batalimale koko halomha:ha:lalo so hapuloma dla nati-imhalapo. Adipalati, epapele sota yia:ta batalimale koko halomha:ha:ta ikadepe kokoye hemele hahatimiyomha:ha:po. ¹⁹⁻²⁰Amasiyama epapele sotapo yiskamu yia:ye

God yeitamale so dloweye po-ala:na. Adipalati, yia:tapo ta:lamo hema Godta mimita:ple alisisi hapuloma tlamatapo yia: dla Godta ikadepe hala kokoye mo-botomastamdepo. Epame yia:ta God ponatilalo wekele tope, asiyama yia:tapo ya:ye ikadepe God demama ya:ta itiyamaleta kokó ela ma haliyamale dla natilipe. Adipalati, ta:lamo kotiyamale tle pumama Godtapo ya:skamu ya:ta ikadepe hala kokoye opa hapuloma dla ya:ta mimita:ple alisisi tle ma-nati-impuwapo. Epapedeme opatapo yiskamu yia:ye God yeitamana dloweye po-ala:na.

²¹Epapedeme yia: God koko me-yia:malamale tope, yia:ta ya: dla poheodesemde, epame ya: dla malamale pohimsemde. Amasiyama yia:ta momalamaleye pta sikemte bobtalimana, epame yia: dupa duluye amtuwaletapo sikemte poposatilipo ha:ha:mdepo. ²²Epame yia:tapo yiskamu yia:ye ka:depo momalamale so demdepo. Amasiyama yia:ye sikemte yeitamale sopo. ²³Epapedeme yia: kokó halepo hallalo God hi di dla ta:demama siyele hamilowe koko me-melepame ma biskapa god dlopi dota mimita:ple dla sisiyemha:ha:mdepo. Yia: epo sisiyemha:ha:mama opita opa mila:pi halomale dla sisiyemha:ha:mdepo, epalati opita tea mila:pi halomale dla sisiyemha:ha:mdepo, epalati opita aliya mila:pi halomale dla sisiyemha:ha:mdepo, epalati opita ilama mila:pi halomale dla sisiyemha:ha:mdepo.

²⁴Epapedeme yia:tapo ipapele koko halomha:ha:lali Godta yia:ye batalimale koko medla pomoluwapo. Epame dulu edla opatapo miyelo yia:ta solotamale koko dolumama yia: motoye batalimale koko dla hatitimha:ha:mduwapo. ²⁵Epame yia:ye ikadepe God yu dla mikadepe dloweye memelepame ma biskapa yu dla mikadepe depame mo-dolumtamalapo. Epammama yia:ye alisisi mimita:plalo God ikadepe dla pomikadepe dlalo ma ya:ta mimita:ple alisisi dla mikadepe depo tamalapo. Amasiyama hatlo God hi di dla ta:dlowe tlo ka:pi. Eye ikadepepo.

²⁶Epapedeme opatapo epapele koko halomha:ha:la natipame Godtapo yia: bobtalimale dulu medla dolumtelepo depame me-pomoluwapo. Epapele koko tle wola:tapo yia: opa ikadepeye memelepame ma wola: yimkaduloye uhalomha:ha:po. ²⁷Epammama opa mape yia: wola: ikadepeye memelepame matle opa yimkaduloye uhalomha:ha:po. Epapedeme yia:ye batalimale koko ipapele sikemte halomha:ha:deme yia: moto dla batalimale asiyamaye hapo.

²⁸Epapedeme opatapo God kokoye sikemte welilati asiyama Godtapo yia:ye batalimale koko momalamale dulu medla ha:ha:lepo depame me-pomoluwapo. Epapele koko tle yia: dla batalimale koko opata pohaleli dle koko halomoloweta yia: dulu dla me-elapo. ²⁹Epapedeme yia:ye batalimale koko ipapeletapo yia: dulu dla poposatilipo ha:ha:po. Eye ullu walle kokopo, epame alisisi sikemte solotamolowe kokopo, epame

alliwe koko mate siyaladlowe koko matepo, epame ya:mkale ellewe kokopo, epame ya:mkale yumuluwe kokopo, epame ya:mkale mate natalimolowe kokopo, epame mala-atlowe kokopo, epame ya:mkale dla batalipo malamolowe kokopo, epame ya:mkale yu ballowe kokopo, ³⁰epame ya:mkale batalipo putlopo atlowe kokopo, epame God dla elle himhallowe kokopo, epame ya:skamu ya: tlo ka:dena depame di dla hamhetlowe kokopo, epame ya:skamu pepemolowe kokopo, epame batalimale koko amko halowe koko atotomolowe kokopo, epame a mate wai mate yia: yu dla posalladlalo wekelowe kokopo. ³¹Epame yia:ye yiyilamale sopo. Epame yia:ye yia:ta yu itiyapo hatitimale podolumalalo wekelalo sopo. Epame yia: yimkadulo popolowamalalo wekele sopo. ³²Epapedeme Godtapo ipapele koko halomha:ha:lalo soye yia: batalimale asiyama dla pallipe duwaye me-yia:malamana. Amasiyama yia: mepapele batalimale koko me-halomha:ha:mama ma yimkadulo watle, “wua: ma halomha:ha:iya,” demha:ha:po.

Godye ka:depo koko gladlalopo

2 ¹Epapedeme wa: po-ala:na, wa:tapo wa: amkale koko glademhalloweye. Adipalati, wa: ma batalimale koko hatlo meye halomhalapo. Epapedeme wa:ta wa: amkale koko gladepame ya: watle ya: batalimale asiyama halopi demhalatapo wa:skamu wa: koko ma me-glademhalapo. ²Amasiyama dimalamana, Godtapo batalimale so koko glademama woloma ka:depo glademde kokoye. ³Epapedeme wa:ta yimkadulo koko glademhalemama ma hemele batalimale koko hatlo meye halomhallepiye, wa: adipo Godta kasilamale tle alikili dla haodepa:? ⁴Amasiyama Godtapo wa:ta malamale meyelo pe dlepo depame wa:ye polowamama sadle mate wa: omhalapo. Amasiyama wa: ya:ta namkale dle koko eye pokoko desema. Adipalati, wa: powa:malamata:, Godta namkale dle kokotapo wa:ye seme ya: hala dla ta kokoye. ⁵Amasiyama wa: dupa dulu sikemte kokalle koko mate epo malamale pomeyelo pe dlowe koko matetapo God dla sikemte siyaladle hapimhalapo. Epapedeme ya:ta koko gladlowe alilata pulupiye, oloma edla wa: watle ya:ta siyaladleye nati-ilipe.

⁶Epapedeme Godtapo opata koko halomha:ha:le asiyama woloma ala:le mate hapilipe. ⁷Epapedeme opa anawolotapo hutulli mate ka:ka:dle koko halomha:ha:mama Godta hela:dle mate epo ya:ta hapili pasakalo mate totamha:ha:lepiye, asiyama Godta yia: watle halepo halepo pasakaloye halopilipe. ⁸Amasiyama opa anawolotapo yia:ta solotamale koko tlo dolumama ikadepe koko allipame ma batalimale koko dolumtamellepiye, yia: asiyama Godta kasilamale dulu dla ha:ha:lepe. ⁹Ta:lamo so anawolotapo batalimale koko halomha:ha:lepiye, Godtapo asiyama yia: dla wotiyalle hapilipe. Epammama ya:tapo Yu so tatile wotiyalle

hapipame matle po-Yu so dla wotiyalle hapilipe. ¹⁰ Amasiyama Godtapo ka:ka:dle koko halomha:ha:lalo so dla hela:dle mate epo sadle mate halopilipe. Epammama ya:tapo Yu so tatle hapilipe, epame alotle ma po-Yu so dla hapilipe. ¹¹ Adipalati, Godta opa hapuloma koko glademama woloma ka:dle api tle gladlepe. Ya: seme tiyape tlo pogadlowa.

¹² Epedeme po-Yu so opa anawolotapo Mosesta aiyalma hatitimale kokoye yeitapo ha:ha:mama batalimale koko halomha:ha:lepiye, yia: ma batalimale asiyama me-halepe. Epame Yu so opa mape, anawolotapo Mosesta aiyalma hatitimaleye mo-malapame ma batalimale koko mehalomha:ha:lepiye, Godtapo aiyalma e mate ala:mama yia: watle yia: batalimale asiyama hapilipe. ¹³ Adipalati, Mosestapo ipo imuwapo, “Isikimi aiyalma koko tlo dalepo ha:ha:lalo soye Godtapo ya: mila:pi tle po-ullu pa:talo so demhalasema. Amasiyama opa anawolotapo aiyalma koko dalepame yia: moto mate koko halomha:ha:lalo soye Godtapo ya: mila:pi tle ullu pa:talo so demhalapo.” ¹⁴ Epedeme po-Yu soye Mosesta aiyalma hatitimale kokoye poyia:malamana. Epapele tlope yia:tapo koko halomha:ha:mama aiyalma kokota atla koko mate ala:po halomha:ha:lepiye, eta yia:ta batalimale koko mate ka:dle koko mate malanatiloweye imdepo. ¹⁵ Epapele koko tle di natipo, aiyalma kokoye yia: dupa dulu dla ma-hatitimale some ha:ha:po. Adipalati, yia:tapo batalimale koko halati yia:ta malamaleta yia: dla wota:le hampumdepo. Epame asiyama ka:dle koko halati yia: dla siyele hampumdepo. ¹⁶ Koko iye koko gladlowe alila dla haliyamale dla nati-ilipe. Adipalati, alila oloma edla Godtapo Yesu Keliso tle opa hapuloma koko glademama opa hapuloma yia: hemele kokoye haliyamale dla botomastlepe. Koko iye ka:dle yu na:ta atlama itapo epo atlapo.

Yu so mate epo aiyalma koko mate

¹⁷ Epedeme na: Yu so wua: watle atlema. Wua: wuskamu Yu so ikadepe depame Mosesta aiyalma hatitimale dla hitaha:ha:lalo so demdepo. Epame wuskamu wua: tlo God mateka:pi dla ha:ha:lalo so depame di dla halopo hetamdepo. ¹⁸ Epame wua:ta atlemama, “di Godta solotamale koko ma mo-dimalamana. Adipalati, di aiyalma hatitimale ma-sesa:pame ka:dle koko mate batalimale koko mate malanatiloweye mo-dimalamana,” demdepo. ¹⁹ Epame wua: wuskamu wua:ye inoma pa:talo so opaye api imalalo so, demdepo. Epame amtuwale dulu dla ha:ha:lalo so yia: hela:dlepo, demdepo. ²⁰ Epame wua: mape yiyilalimale so mate epo koko yeitalimale so mate imoloweye ma-ala:na, demdepo. Adipalati, wua:ta atlemama, “aiyalma kokoye dia: watle hamiwa depame ma ikadepe koko hapuloma mape ma-dimalamana,” demdepo. ²¹ Amasiyama wua: adipalati yimkadulo tlo imha:ha:mama ma wuskamu wua:ta imale koko podolumalalo wekemdi? Adipalati, wua: wua:ta yu

atlemama, “Yimkadulo alisisi uhalomiyo,” depame ma muwolo upo alisisiye uhalomha:ha:po. ²²Epame ma wua:ta, “Upo oplami mate epo upo a:ya mate uhalomiyo,” demdepo. Amasiyama muwolo epapele kokoye halomha:ha:mdepo. Epame ma biskapa dota mimita:ple god dla sikemte allimha:ha:tlope, wua: ala biskapa god dla sisiyelalo aya dla tame alisisiye uhalomha:ha:mdepo. ²³Epedeme wua: wuskamu di dla halopo hehetamama aiyalma kokoye dimalamana, demdepo. Amasiyama wua: aiyalma koko eye hauwokokomale koko tle God hiye mo-batalimdepo. ²⁴Epalalati God yu bukata epo atlapo,

“Yu so wua:ta:po batalimale koko halomha:ha:
natipame asiyama po-Yu sotapo God hi mate putlopo atlamyapo,”
depo.

²⁵Epedeme wa: aiyalma koko dolumhallepiye, eta kapala kestale kokoye koko walena dlepe. Amasiyama wa: aiyalma hauwokokomelepiye, wa: kapala pkestlalo wekele oplami some hallepe. ²⁶Epedeme kapala pkestlalo wekele oplamitapo aiyalmata atlama kokoye woloma dolumhallepiye, eta ya:ye kapala kestale oplami some hallepe. ²⁷Epedeme Yu so wua: dla aiyalma hatitimale koko mate epame kapala kotimolowe koko mate me-elapo. Amasiyama wua: aiyalma me-hauwokokomdepo. Epapele dulu dla opa anawolotapo kapala pokotimalalo wekemama aiyalma koko tlo woloma dolumtamalema:, ewolotapo wua:ye bobtalimale so dlepe.

²⁸Epedeme wa:ta kapala kestepo hala kokotapo wa:ye po-Yu oplami ikadepe desema. Adipalati, ikadepe Yu oplami depo hallowe kokoye kapala di hema ponatisema. Epame kapala kestlowe koko ikadepe mape isikimi kapala di dla pe-elasema. ²⁹Epedeme ikadepe Yu oplami dlowe kokoye ipo elema, oplamitapo God mila:pi tle ka:depo ullu pa:po hallepiye, eta ya:ye Yu oplami ikadepe depo halapo. Epame kapala kestlowe ikadepe koko mape isikimi kapala di dla pe-elasema, amasiyama Sokotapo opa dupa dulu dla ulu hatitimhalapo. Epedeme epapele sotapo opa tle siyele pohamha:ha:sema, amasiyama God tle hamha:ha:po.

3 ¹Epedeme Yu oplami depo hallowe kokoye apa koko ka:dleta elema:?
Epame kapala kestepo hallowe koko mape apa koko ka:dleta elema:?
²Yao, ka:dle koko me-hutiyepo. Adipalati, Godtapo ka:yapa ya: yuye Yu so watle hamiwapo.

³Amasiyama Yu so opitapo God yu dla podolumalalo ha:ha:lali natipame Godtapo asiyama yia: tle kostapa:? ⁴Hao, pe-epapolowa. Adipalati, hatlo God tlo ikadepe koko siyapo tlo atlalo halapo. Amasiyama di ta:la so hapulomaye isikimi mala-atlalo sopo. Ame adipalati, God yu bukatapo God koko dla epo atlapo,

“Wa:ta yu atlati opata dalepame wa:ye ikadepe yu tlo atlema
demdepo.

Epame koko gladle dla wa:tapo opata atlowe malamaley
tla:mtame halapo,” depo.

⁵Epapedeme dita batalimale koko halomha:ha: etapo Godta ikadepe koko tlo halomhala kokoye nati-imdepo. Epedeme di adipo atlepa: God di batalimale asiyama hamilowe poka:dena depa:? ⁶Hao, ka:dena, Godtapo di batalimale asiyama hamilowe. Adipalati, Godta di batalimale asiyama pohamilalo wekelepiye, ya: adipo ta:lamo so koko gladepa:? ⁷Epedeme oplami haletapo epo atlowe sepena, “Na:ta mala-atlamde kokotapo Godta ikadepe koko siyapo tlo atlamhala kokoye botomastamdepo. Epedeme na:ta poka:dle koko halomdetapo Godta ka:dle koko mate hela:dle mate nati-ilipiye, ya: asiyama poka:dena, na: wate na: batalimale asiyama hamilowe.” Epapele tope ipapele malamale halowe poka:dena. ⁸Epame ma oplami haletapo epo atlowe sepena, “Di batalimale koko me-halomha:ha:lowa. Epalati ka:ka:dle kokotapo woyamelepe.” Amasiyama malamale epo momalamha:ha:lowe pta batalimana. Epapele tope opa opitapo koko iye na:ta imuwayo depame na: hi mate mala-atlamyapo. Epedeme ka:dena, ipapele so dla Godtapo yia: batalimale asiyama hamilowe.

Oplami haleta God mila:pi tle ka:depo pohalasema

⁹Epapedeme di Yu so dia: tlo ka:ka:dle so depo ha:ha:mama po-Yu so tlo batalimale so depo ha:ha:ma:? Hao, pe-epapena. Epapele dulu dla na:tapo wua: wate ma-atlamuwapo, Yu so mate epo po-Yu so mate dita yimkata batalimale dulu dla me-ha:ha:po. ¹⁰Ame adipalati, God yu bukatapo epo atlapo,

“Oplami haletapo God mila:pi tle ka:depo pohalasema.

Ka:dle oplami hale hawa ikadepe.

¹¹Epame God koko malastale oplami hale hawa ikadepe.

Epame God totamalalo oplami hale hawa ikadepe.

¹²Ame adipalati, opa hapulomatapo God tle mo-kokotipo tamalemama sikemte batalipo ha:ha:po.

Epapele dulu dla ka:depo halale oplami hale hawa ikadepe.

¹³Epame yia:ta yuhamde kokoye wabasi dulu tle hutallu woyamde epapele some halapo.

Epame yia:ta yuhalë oloma edla mala-atlamale yu tlo atlamha:ha:po.

Epame yia: yu opiye ilama mitikape some opa dla wotiyalle hamimdepo.

¹⁴Epame yia: alila hapuloma yimkadulo dla elle himha:ha:mama bulumale yu yuhamha:ha:mdepo.

¹⁵Epame yia: yimkadulo potimolowe koko dla mo-dinapopo siyamdepo.

16 Epapele dulu dla yia: tamalemama wotiyalle koko mate epo
upiyele koko mate yimkadulo watle hapimtamalemdepo.

17 Epedeme yia: dla yimkadulo mate sadepo ha:ha:lowe kokoye
poyia:malamanana.

18 Epapedeme yia: dla God wowota:le hawa ikadepe.”

19 Epedeme dimalamana, yu iye aiyalma hatitimale hapili so dla
hamiwapo. Adipalati, yu itapo ta:lamo so hapulomatapo yia: batalimale
malanatipo ma Godta kasilamale isili tle ha:ha:lepo depame apuwapo.
Epapele oloma dla ditapo God mila:pi tle diskamu gadlowedeme di
koko hemele kesomoloweye po-ala:lowa. 20 Adipalati, isikimi aiyalma
koko dolumolowetapo Godta dia:ye ya: mila:pi tle po-ullu pa:talo so
dlowa. Amasiyama aiyalmatapo isikimi di bobtalimale kokoye dia: watle
haliyamale dla bobotimatimhalapo.

Ullu pa:po hallowe kokoye mikadepe dle tle puapo

21 Epapedeme di aiyalma dolumha:ha:le koko tle God mila:pi tle ullu
pa:talo so depo poha:ha:sema. Amasiyama God yu bukata atla koko
dolumama Godtapo di watle api hale tle mo-botomastauwapo, ditapo ya:
mila:pi tle ullu pa:po ha:ha:lowe kokoye. 22 Epedeme dita Lod Yesu Keliso
dla mikadepe dlati asiyama Godtapo dia:ye ullu pa:talo so demhalapo.
Epapedeme dita hapuloma Yu so mate epo po-Yu so matetapo api hatlo
itle pasakalo halomelepe. 23 Adipalati, dita hapulomatapo mo-bobtalimale
dulu dla mo-tutula:pame Godta hela:dle mate po-ala:po ha:ha:sema.
24 Amasiyama epapele tope Godtapo dia:ye sikemte bokotiyapo
malapame Yami Yesu Kelisota di batalimale asiyama hapame ma dia:
eleme di batalimale tle alikili dla woyamalati asiyama Godtapo dia:ye
ma ullu pa:talo so duwapo. 25 Epedeme Godtapo Yami Yesu Kelisoye di
batalimale yilo polopo depame tulune duwapo, ditapo Godta kasilamale
tle alikili dla woyamelepo depame. Epapele dulu dla ditapo Yesu Kelisota
di batalimale yilo omali olostauwa depo ya: dla mikadepe dlepiye,
asiyama Godta dia:ye ya: mila:pi tle ullu pa:talo so dlepe. Epapedeme
ipapele kokotapo Godta ka:depo hala kokoye nati-ipo. Ame adipalati, Yesu
ala popolalo haluwa oloma edla opata batalimale koko halomha:ha:lali
Godtapo yia: sikemte bokotiyapo malamale elemama yia: watle yia:
batalimale asiyama pohamimdena. 26 Epapele dulu dla wata oloma hema
Godtapo woloma ka:dle koko siyapo tlo hamhalapo. Epedeme Yesu dla
mikadepe dlalo soye Godtapo ya: mila:pi tle ullu pa:talo so demhalapo.

27 Epedeme dia: dla api elema:, ditapo diskamu di dla hame hetloweye?
Hao, pe-elaseama. Adipalati, isikimi mikadepe dle tle dia:ye God mila:pi
tle ullu pa:talo so demhalapo. Ditapo aiyalma koko dolumha:ha:le tle
po-aposema. 28 Epapedeme dia:ye isikimi mikadepe dle tle Godtapo ya:
mila:pi tle ullu pa:talo so demhalapo. Amasiyama dita aiyalma koko

dolumha:ha:lati po-aposema. ²⁹Epapele dulu dla di natipo, Godye hatlo Yu so yia: God pohalasema. Amasiyama ya: ma po-Yu so yia: God halapo. ³⁰Epele dulu dla Godye hatlopepo. Epame dia:ye ya:tapo ya: mila:pi tle ullu pa:talo so depo elemolowe apiye hatlopepo. Epedeme Yu so mate epo po-Yu so mateye hatlo mikadepe dle tle Godta yia:ye ya: mila:pi tle ullu pa:talo so dlepe. ³¹Epapedeme dita mikadepe dle api tle dolumtamala itapo aiyalma kokoye pokoko dema:? Hao, pe-epapesema. Aiyalma kokoye, koko walena.

**Godtapo A:iblahamta mikadepe dle koko natipame
ya:ye ullu pa:le oplami duwapo**

4 ¹Epapedeme ditapo di mama A:iblaham koko dla adipo atlepa:? ²Ya:ye ya:ta koko halomhalaleta ya:ye God mila:pi tle ullu pa:po haluwa dleta ammatiye, eta ya:ta ya:skamu di dla hamhetlowe api ellemla. Amasiyama ya:ye God mila:pi tle ya:skamu di dla pohamhetamdena. Adipalati, ya: meyelo koko halë tle ullu pa:po pohalana. ³Ame adipalati, God yu bukatapo epo atlapo,

“A:iblahamtapo God dla mikadepe dlati

Godtapo ya:ta mikadepe dle natipame ya: mila:pi tle ya:ye ullu pa:le oplami duwapo.”

⁴Epapele dulu dla oplamitapo oko halepiye, ya: oko asiyama eye ponamkale dle alisisi hamisema. Amasiyama eye ya:ta oko halë asiyama epo. ⁵Amasiyama oplamitapo ya:ta koko halomhalale tle God mila:pi tle po-ullu pa:le oplami dlowa. Amasiyama hatlo mikadepe dle tle Godtapo oplamiye ya: mila:pi tle ullu pa:le oplami demhalapo. ⁶Epedeme Godtapo oplamita koko halomhalale posesa:lalo ya:ye siyele hamipame ullu pa:le oplami demde kokoye Deibiditapo God yu buka dla epo atluwapo,

⁷“Opa anawolo batalimaleye Lodtapo mo-hiyotipo weliwa, wua: sisiyeiya.

⁸Epame opa anawolo batalimaleye Lodtapo asiyama pohamilalo wekema; wua: sisiyeiya.”

⁹Epapele dulu dla siyele koko iye hatlo kapala kotimale so dla elema:? O kapala pokotimalalo wekele so dla ma me-elema:? Epedeme di ka:yapa ma-atlalepo, Godtapo A:iblahamta mikadepe dle natipame ya: mila:pi tle ullu pa:le oplami duwapo. ¹⁰Amasiyama adipalalo Godtapo A:iblahamyeye ya: mila:pi tle ullu pa:le oplami duwa? Ya:ye kapala mo-kestepo hallati apuwa? O kapala ala pkestlalo hallati apuwa? Amasiyama dulu edla ya: kapala ala pkestlalo hallati Godtapo ya: tatle ya:ye ya: mila:pi tle mo-ullu pa:le oplami duwapo. ¹¹Epedeme A:iblahamta ala kapala pkestlalo halemama God dla mikadepe dlati Godta ya:ye ullu pa:le oplami duwapo. Epapele alotle ya: kapalaye kestawapo, ya:ta God mila:pi tle mo-ullu

pa:le oplami depo hala kokoye nati-iliwedeme. Epapele koko tle opa anawolotapo kapala pokotimalalo ha:ha:mama yia:ta mikadepe dle tle ullu pa:po ha:ha:ma:, ewolo yia: a ikadepeye A:iblahampo. ¹²Epame opa anawolotapo kapala kotipo ha:ha:mama A:iblaham some God dla mikadepe depo ha:ha:ma:, ewolo mape A:iblaham ya: yimlala ikadepepo.

Godta atlamale kokoye A:iblahamtapo mikadepe dle koko tle halë

¹³Epedeme Godtapo A:iblaham mate epo ya: mamadulo mate dla yu itiyapo himimama ta:lamo pato iye yia: watle hamilowepo duwapo. Epapele dulu dla koko iye A:iblahamtapo aiyalma koko dolumhallati natipame po-atlana. Amasiyama A:iblahamtapo God dla mikadepe dle koko natipame atluwapo. ¹⁴Epapedeme opatapo Godta atlale koko iye isikimi aiyalma koko dolumha:ha:le tle halomatiye, asiyama mikadepe dle kokota koko pa:le ellemla. Epame Godta A:iblaham dla yu itiyapo atlale koko mape koko pa:le ellemla. ¹⁵Adipalati, aiyalma kokotapo aiyalma postlalo so dla Godta kasilamaleye hampumdepo. Amasiyama aiyalma kokota pe-ellalo wekematiye, opata adipo aiyalma postamha:ha:pa:?

¹⁶Epapele koko tle mikadepe dletapo koko pato halapo. Adipalati, Godta ya:ta yu itiyapo himili atlamale kokoye dita mikadepe dle koko natipame isikimi namkale dle tle dia: dla hapilipe. Epapedeme Yu so mate epo po-Yu so mate dulu dla anawolotapo A:iblahamta mikadepe depo haluwa epapele some ha:ha:ma:, yu itiyapo himili iye yiolepo. Adipalati, A:iblahamye mikadepe dle so hapuloma yia: apo. ¹⁷Ame adipalati, God yu bukatapo A:iblaham koko dla epo atlapo,

“Na:tapo wa:ye ta:lamo so hapuloma yia: a hallepo depame wa:ye mo-hulumuwapo,” depo.

Epedeme A:iblahamta God dla mikadepe dle koko tle koko iye mo-woyamuwapo. Epedeme God iye palli tle ma pasakalo dlalo Godpo. Epame God hatlo me-ita amko koko kotiyamalalo God halapo.

¹⁸Epapele dulu dla Godtapo A:iblaham watle yu itiyapo himimama, “wa:tapo ta:lamo so hapuloma yia: a hallepe,” dlati asiyama A:iblahamtapo koko edla malamale potatlamalalo isikimi mikadepe depame omhaluwapo. Adipalati, Godta ma ya: watle epo atluwapo,

“Wa: mamadulotapo sikemte pasatamama sesa:loweye po-ala:lowa,” duwapo.

Epalati A:iblahamtapo yimlala pohatitimalalo mo-totoyemala halemama mepele Godta atlale yu dla mikadepe duwapo. ¹⁹Epapele dulu dla A:iblahamye mo-totoyemala halemama 100 sokomoko epapele umala taiyo. Epalati ya:llu Sela mape yimlala pohatitimalalo hamkapi a:ya polomama ma-alluyemala polaiyo. Amasiyama A:iblahamtapo Godta atlamale yu dla ala me-mikadepe depo halaiyo. ²⁰Epame ya:tapo Godta ya: dla yu itiyapo himili koko dla mikadepe depo halemama malamale

potatlamalalo halaiyo. Epame ya:ta mikadepe dletapo ya: dla itiyamale hamilati ya:tapo God dla siyele ta:demduwapo. ²¹Epame ya:tapo epo malamduwapo, “Godtapo meyelo na: dla yu itiyapo himili kokoye halepe,” demduwapo. ²²Epapedeme Godta A:iblahamta mikadepe dle koko natipame ya:ye ya: mila:pi tle ullu pa:le oplami duwapo.

²³Epapele dulu dla yu iye hatlo A:iblaham watle po-atlana.

²⁴Amasiyama di watle ma me-atluwapo. Adipalati, di mape God mila:pi tle mo-ullu pa:talo so duwapo, ditapo di Lod Yesu Keliso powale tle ma pasakalo dle God dla mikadepe dlati. ²⁵Epedeme Godtapo Yesuye di batalimale dla polopo depame hamiwapo, ya:ta popo sila:tili kokotapo dia:ye God mila:pi tle ullu pa:talo so dlepo depame.

God mila:pi tle ullu pa:po hallowe koko

5 ¹Epapedeme dita God dla mikadepe dle koko tle dia:ye God mila:pi tle mo-ullu pa:talo so depo ha:ha:po. Epedeme di Lod Yesu Kelisota koko halë tle God mate sadepo ha:ha:po. ²Adipalati, dita mikadepe dle koko tle Kelisotapo dia:ye Godta bokotiyapo malamale dla elempuwapo. Epapedeme dia:ye Godta bokotiyapo malamale dulu dla ha:ha:mama Godta hela:dle ipi halowe dla sisiyele mate dalemha:ha:mama omha:ha:po. ³Epame di ma sisiyemdepo, wotiyalle kokota dia: dla pula natimama. Adipalati, wotiyalle koko itapo dita kokalepo ha:ha:lowe kokoye hampumdepo. ⁴Epame kokalepo hallowe kokotapo ikadepe oplami depo hallowe kokoye hampumdepo. Epame ikadepe oplami depo hallowe kokotapo itiyamale mate pasakalo gadleta puluwe koko dla dalemhalemama omhallowe kokoye hampumdepo. ⁵Epame dalemhalemama omhallowe koko etapo dia: watle wota:le pohamilowa. Adipalati, Godtapo ya: Hela:dle Sokoye dia: dla ma-hamiwapo, ya:tapo di dupa dulu dla Godta bokotiyapo malamale kokoye poposatilipo mellepo depame.

⁶Epedeme ditapo diskamu gadlowe po-ala:lalo wekele dulu dla ha:ha:liti Kelisota di gadlowe alila ka:dle dla mo-puwapo, batalimale so dia: yilo polowedeme. ⁷Epapele dulu dla oplami haletapo ya:mkale pasakalo gadlowe yilo popolowa. Amasiyama epapele tlope pona:malamana, oplami haletapo ka:dle oplami pasakalo gadlowe yilo polowe sepena. ⁸Amasiyama Godtapo ya:ta bokotiyapo malamale pato nati-imama Yami Yesu Kelisoye tulune duwapo, ditapo batalimale dulu dla ala me-ha:ha:liti dia: yilo polopo depame.

⁹Epapedeme dia:ye Keliso omali tle God mila:pi tle mo-ullu pa:talo so duwa deme Kelisotapo dia:ye Godta siyaladle tle alikili dla eleme woyamelepe. ¹⁰Epedeme dia:ye God mate ala me-opahale demha:ha:liti ya:tapo dia:ye Yami Yesu Kelisota powale koko tle me-ya:mkadulo duwapo. Epapedeme dia:ye ma ya:mkadulo ikadepe depame Kelisota pasakalo halë

etle ma di pasakaloye gadlepe. ¹¹Epame koko hatlo etapo pe-elasema. Amasiyama di mape wata God dla sikemte sisiyepo. Adipalati, Godtapo di Lod Yesu Keliso tle dia:ye ma ya:mkadulo ikadepe duwapo.

A:damta polowe koko hampulati Kelisota pasakalo hampuale

¹²Epapedeme oplami hatlo A:damta batalimale koko halë tle batalimale kokotapo ta:lamo dla puwapo. Epame batalimale koko etapo polowe hampuwapo. Epapele koko tle opa hapulomatapo yia: bobtalimale asiyama hamama pallipe. ¹³Epapedeme Mosesta aiyalma hatitimale kokoye ala populalo hallati opatapo batalimale koko me-halomha:ha:uwapo. Amasiyama epapele dulu dla Godtapo yia: batalimaleye posesa:mhalana. ¹⁴Amasiyama epapele tlope A:dam tle kotiyapo puame Mosesta haluwa oloma edla opa hapulomatapo A:damta koko halë tle mo-palimpuwapo. Epapele dulu dla yia:tapo A:damta Godta aiyalma himili postale hale epapeleye yia:ta popostana. Epapele tlope yia:ta hapulomatapo me-palimpuwapo.

A:damtapo alotle puluwe Keliso ya:nasama haluwapo. ¹⁵Amasiyama Godta bokotiyapo malamale mate A:damta batalimale koko halë mate pohatlope. Adipalati, oplami hatlope A:dam ya: batalimale tle polowe kokotapo opa hapuloma dla puwapo. Epalati asiyama Godta sikemte bokotiyapo malamale mate epo ya: mila:pi tle ullu pa:po hallowe koko matetapo ma oplami hale tle opa hapuloma dla puwapo. Oplami iye Yesu Kelisopo. ¹⁶Epapedeme Godta bokotiyapo malamale tle puwa koko mate epo A:damta batalimale tle puwa koko mateye pohatlope. Ame adipalati, A:damta batalimale koko hatlo halë tle dita hapulomatapo ma Dlapa mo dla tlowe api dla ha:ha:uwapo. Amasiyama Godta isikimi bokotiyapo malamaletapo dita hapulomata batalimale koko dulu dla ha:ha:lata alikili dla eleme woyamuwapo. ¹⁷Epapedeme oplami hatlopetata batalimale koko halë tle polowetapo opa hapulomaye dokopala depo haluwapo. Amasiyama Godta bokotiyapo malamale tle ullu pa:talo so dle opatapo kokó halepo halepo pasakalo halopame Yesu Kelisota itiyamale tle dokopala so depo ha:ha:lepe.

¹⁸Epapele dulu dla oplami hatlopetata batalimale koko halë tle batalimale asiyama dla polowe kokotapo opa hapuloma dla puwapo. Amasiyama Kelisota ka:dle koko halë tle opa hapulomaye God mila:pi tle ullu pa:le so depame yia: watile kokó halepo halepo pasakalo hamiwapo. ¹⁹Epapedeme oplami hatlopetata God yu dla posalladlalo wekele koko tle opa hapulomaye mo-bobtalimale so duwapo. Amasiyama oplami hatlopetata God yu dla salladle koko tle opa hapulomaye God mila:pi tle ullu pa:talo so depo mellepe.

²⁰Epapedeme Godtapo opa dla ya: aiyalma kokoye hamiwapo, yia:tapo yia:ta batalimale koko sikemte halomha:ha:ye malanatilipo depame.

Epapele dulu dla batalimale kokotapo sikemte ta:mtlati asiyama Godta bokotiyapo malamale mape sikemte ma-a:ma ta:mtapo. ²¹Epapedeme batalimale kokotapo opaye dokopala depo hallati opa dla polowe kokota eluwapo. Amasiyama watapo Godta bokotiyapo malamaleta dokopala depo halemama opaye kokó halepo halepo pasakalo hallowe dla elemtapo. Adipalati, di Lod Yesu Kelisota koko halë tle dita God mila:pi tle ullu pa:po ha:ha:lowe kokoye hauwapo.

Batalimale kokota itiyamaleye yumili

6 ¹Epapedeme di batalimale koko me-halomtamelepa:, Godta bokotiyapo malamaleta ta:mtlepo depame? ²Hao, di pe-epapolowa. Adipalati, ditapo ma batalimale koko halomha:ha:lowe dla mo-paliwapo. Epapedeme di ma adipammama batalimale koko dulu medla me-ha:ha:pa:? ³Epapele dulu dla wua: powua:malamata:, dita Yesu Keliso mate hatlope dlepo depame yú tutula:uwa kokotapo dita ya: mate paliwa koko imaye. ⁴Epapedeme dita yú tutula:uwa oloma edla dia:ye Keliso mate mo-palipame wabasi dulu dla mo-popoliyeuwapo. Epame A Godtapo Kelisoye powale tle ma pasakalo duwa epammama dia:ye ya:tapo pasakalo amko dla hohopo ipila:uwapo.

⁵Epapedeme ditapo yú tutula:le koko tle Keliso mate pallipiye, eta ya:ta ma pasakalo dla sila:tiwa epammama di mape ya: mate pasakalo amko dla sillipe. ⁶Epame ma-dimalamana, batalimale koko dita halomha:ha:uwa hapulomaye Keliso mate dali yekelehmimili di dla mogoduwapo, batalimale itiyamale dia: dulu dla elata itiyamale pa:lepo depame. Epame batalimaletapo ma dia:ye podokopala dlalo wekelepo depame. ⁷Adipalati, dita Keliso mate paliwa oloma edla dia:ye batalimale itiyamale tle alikili dla me-eleme woyamuwapo.

⁸Epapedeme di mikadepe dema, dita Keliso mate mo-paliwa koko tle dita ma ya: mate pasakalo amko halomelepe. ⁹Adipalati, dimalamana, Kelisotapo popame ma sila:tiwa kokoye. Epapedeme ya: matle popolowa. Adipalati, polowe kokota ya: mamisika: hamoloweye itiyamale hawa. ¹⁰Epapedeme Kelisota pomama batalimale itiyamaleye yumpo hamastauwapo. Epame ya: watapo pasakalo halemama hatlo God yilo halapo. ¹¹Epapele api hatlo metle wua: mape batalimale itiyamaleye ma alo dla pololuwapo. Epalati Yesu Kelisotapo wua: watle pasakalo hamiwapo, wua:tapo hatlo God yilo ha:ha:lepo depame.

¹²Epapedeme wua: mota solotamale koko dolumalala depame wua: palilalo motoye batalimaleta dokopala depo hala de demiya. ¹³Epame wua: Saiten ya: oko so dlala depame wua: motoye batalimale koko halomolowe dla hatitimiya. Amasiyama wua: motoye ka:ka:dle koko halomolowe dla God watle halopiya. Ame adipalati, Godtapo wua:ye palli tle ma pasakalo ha:ha:lowe dla ta:ta:duwapo. ¹⁴Epapedeme batalimale

kokotapo wua:ye ma podokopala depo halasema. Adipalati, wua: ma aiyalma koko dulu dla poha:ha:sema. Amasiyama wua:ye wata Godta bokotiyapo malamale dulu dla ha:ha:po.

**Batalimale koko melepame ma ka:dle koko
dla salladepo sela:lowe koko**

¹⁵Epapele dulu dla Godta bokotiyapo malamaletapo dia:ye aiyalma kokota itiyamale tle ma alikili dla eleme woyamuwapo. Ame ka:deta, ditapo aiyalma koko tle ma alikili dla woyapo ha:ha:mama batalimale koko me-halomha:ha:loweye? Hao, pe-epapolowa. ¹⁶Adipalati, wua: powua:malamata:, wua:ta salladepo dolumtamala kokotapo wua:ye dokopala depo hala kokoye? Epapele dulu dla wua: batalimale koko dla salladepame dolumtamelpepiye, wua:ye pallipe. Amasiyama wua: God yu dla salladepame dolumtamelpepiye, wua:ye God mila:pi tle ullu pa:talo so depo ha:ha:lepe. ¹⁷Epedeme wua:ye ka:yapa batalimale koko dla salladepame dolumsiyamduwapo. Amasiyama na: God dla siyele yu atlema. Adipalati, ka:dle yuta wua: dla pulati wua:tapo kikitilata hampame dolumha:ha:po. ¹⁸Epedeme watapo wua:ye batalimale koko itiyamale tle alikili dla woyapame ma ka:ka:dle koko dla salladepo siyamapo.

¹⁹Epapedeme na: koko iye wua: watle atlemama woloma botomastepo atlowama, wua:ta malamelepo depame. Epedeme wua: ka:yapa wua: motoye batalimale koko halomolowe dla hapimduwapo. Amasiyama watapo wua: motoye ka:ka:dle koko halomolowe dla God watle halopiya, wua:tapo ma ya: opa ikadepe depo ha:ha:lepo depame. ²⁰Epedeme wua:ta ka:yapa batalimale kokotapo wua:ye dokopala depo elemtauwa oloma edla ka:dle kokotapo wua:ye podokopala depo tana. ²¹Epame wua:ta batalimale koko halomduwatapo apa koko ka:dleye wua: dla hampuwa? Hawa. Amasiyama isikimi wua: dla polowe koko tlo hampumduwapo. Epedeme wua: ma wata koko e halomolowe dla wowota:po. ²²Amasiyama wata oloma hema Godtapo wua:ye batalimale itiyamale tle alikili dla eleme woyamuwapo. Epapele koko tle wua:ye watapo God yu dla salladepo siyamapo. Epame koko itapo wua:ye God ya: opa depame halepo halepo pasakalo hallowe koko dla eleme telepe. ²³Epapedeme batalimale asiyamaye polowe kokota elapo. Amasiyama Godtapo ya:ta bokotiyapo malamale tle dia: watle kokó halepo halepo pasakaloye hapimhalapo. Pasakalo eye di Lod Yesu Keliso dulu dla elapo.

Dia:ye aiyalma koko dulu dla poha:ha:sema

7 ¹Epedeme aiyalma koko mo-malastale so namkadulo, wua: mo-wua:malamana, adipalati, aiyalma kokota atlemhalaye mo-palli so dla po-atlemhalasema. Amasiyama ala me-ha:ha: so dla atlemhalapo.

²Epapele dulu dla nasama kokoye ipo. A:yatapo oplami hapo hallepiye, ya: aiyalma koko dolumama isikimi hatlo ya:wolali mate hallepe. Amasiyama ya:wolalita polopiye, ya:ta ya:wolali hapo halale aiyalma dulu tle ma alikili a:ma woyapo tame halapo. ³Amasiyama epapele dulu dla ya:tapo ya:wolali ala me-hallati ma tame oplami hale halepiye, ya: oplami eye uhapo. Amasiyama ya:tapo ya:wolalita mo-polati matle tame oplami hale halepiye, ya: oplami eye po-uhasema.

⁴Epapedeme mikadepe dle so namkadulo, wua: mape mepapena. Adipalati, Kelisota pouwa koko tle wua: mape palli so some ha:ha:po. Epapele koko tle aiyalma kokotapo ma wua:ye po-omhalasema. Adipalati, aiyalmata atla kokoye mo-palli so dla po-atlasema. Amasiyama powale tle sila:tili Kelisotapo wua:ye omhalapo, wua:tapo God ya: oko dulu dla dlomoko some milimha:ha:lepo depame. ⁵Epedeme ditapo ka:yapa mota solotamale koko dulu dla siyamalati aiyalma kokotapo dita batalimale koko halomolowe ma-a:ma solotamale pato eluwapo. Epapele dulu dla batalimale solotamale koko etapo dia:ye polowe dla eleme tamduwapo. ⁶Amasiyama dita Keliso mate paliwa koko tle di watapo aiyalma koko dulu tle alikili dla mo-woyapo tame ha:ha:po. Epapedeme aiyalma koko itiyamaletapo dia:ye ma po-omhalasema. Epame di ka:yapa aiyalma koko dolumha:ha:uwa tle God dla salladepo siyamduwapo. Amasiyama di watapo Sokota itiyamale tle ma God dla salladepo siyamapo.

Godta aiyalma hatitimale kokotapo di batalimale nati-imhalapo

⁷Epedeme di aiyalma koko dla adipo atlepa:? Aiyalma kokoye batalimale kokota:? Hao, pobatalimana. Amasiyama aiyalma koko itapo na: dla na: batalimale kokoye haliyamale dla nati-iwapo. Epapele dulu dla aiyalma hatitimale dulu dla aiyalma haletapo epo atlapo, “Wa: ase ya:mkale alisisi sikemte solotamiya,” depo. Epapedeme na: yu i sesa:pame epo malamuwa, ya:mkale alisisi sikemte solotamolowe kokoye batalimale kokopo. ⁸Amasiyama batalimaletapo aiyalma koko dulu dla api natipame na: dupa dulu dla batalimale halowe solotamale ta:duwapo. Amasiyama aiyalma kokotapo hawa halematiye, eta batalimale koko mape itiyamale pa:le hallemla. ⁹Epapedeme na:tapo ka:yapa aiyalma koko pomalamalalo haluwa oloma edla na: siyele mate haluwapo. Amasiyama na:tapo aiyalma koko malastauwa oloma edla na: naskamu na:ye batalimale oplami depame polowedeme haluwa kokoye malastauwapo. ¹⁰Epedeme na:ta malamaletapo aiyalma kokotapo na: wadle pasakalo hampuluwe tepo duwa, amasiyama isikimi polowe koko tlo na: dla hampuwapo. ¹¹Epapele dulu dla batalimaletapo aiyalma koko dulu dla api natipame na:ye mala-atlepame polowe dla semtauwapo. ¹²Amasiyama aiyalma koko iye me-hela:dena epo me-ka:pi. Adipalati, aiyalma koko iye God tle puwapo.

¹³Epedeme adipammama aiyalma koko na:ta ka:dena demdetapo na: dla polowe koko hampupa:? Hawa, aiyalma itapo na: dla polowe koko pohampuana. Amasiyama batalimale kokotapo na: dla polowe kokoye hampuwapo. Adipalati, batalimaletapo aiyalma koko dulu dla oko hamama na:ye batalimale dla semtauwapo. Epapedeme na: wata natima, batalimale kokoye ikadepe sikemte batalimale kokopo.

Dia: opasi dulu dla opahale demhala koko

¹⁴Epedeme dimalamana, aiyalma kokoye Soko tle puwapo. Amasiyama na:ye ta:la oplamipo. Epedeme batalimale koko solotamaletapo na:ye dokopala depo me-semse:po. ¹⁵Epapedeme na: naskamu na:ta koko halomde kokoye woloma pomalanatisemde. Adipalati, na:ta ka:ka:dle koko halomli depo malamde kokoye e pahalomasemde. Amasiyama batalimale koko na:ta pohaleli demde koko tlo ma na:ta halomdepo.

¹⁶Epame na: na:ta koko halomhala iye batalimale koko depame sikemte wota:lepiye, eta aiyalma kokoye ka:pi dlepe. ¹⁷Epapele dulu dla ikadepe na:tapo batalimale koko iye pahalomhalasema. Amasiyama batalimale na: dulu dla halatapo batalimale koko halomhalapo. ¹⁸Epedeme na: batalimale oplami, ka:dle koko haletapo na: dulu dla pe-elasema. Na: solotamdepo, ka:ka:dle koko tlo halomolowedeme, amasiyama na: koko iye pahalomasemde. ¹⁹Adipalati, na: na:ta ka:ka:dle koko siyapo tlo halomli depo malamde kokoye pahalalo, ma batalimale koko na:ta pohaleli dle koko tlo ma na:ta halomdepo. ²⁰Epapedeme na: na:ta posolotamalalo wekele koko halomhallepiye, eye ikadepe na:ta po-posurea. Amasiyama batalimale na: dulu dla halatapo ammalapo.

²¹Epapele dulu dla na: natima, na: solotamdepo, ka:ka:dle koko siyapo tlo halomolowedeme. Epapele tlope batalimaletapo ala na: dulu dla me-halapo. ²²Amasiyama epapele dulu dla na: na: dupa dulu tle Godta aiyalma hatitimaleye ka:pi demde. ²³Amasiyama na: opasi dulu dla opahale dle kokoye me-elapo. Adipalati, mota solotamale kokotapo na:ta ka:dle koko hali depo solotamde koko mate natalimhalapo. Epapele koko tle batalimaletapo na:ye amtuwale aya dulu dla ka:stepo hala sepepo. ²⁴Epapedeme na: ya:mkale. Anta na: gadepa:, na:tapo pasakalo batalimale itle alikili dla woyamoloweye? ²⁵Epapele tlope na: God dla siyele yu atlema. Adipalati, di Lod Yesu Kelisoye na: gadlalopo.

Epapele dulu dla na: solotamdepo, na:ta malamale tle Godta aiyalma hatitimaleye dolumsela:lowedeme. Amasiyama mota solotamale koko na: dla elatapo na:ye batalimale dla ka:stamhalapo.

Hela:dle Sokota dokopala depo hallowe koko

8 ¹Epapedeme opa anawolotapo Yesu Keliso dulu dla ha:ha:ma:, Godta yia: watle yia: batalimale asiyama poloweye pohamilowa.

²Adipalati, batalimale itiyamaleta dia:ye polowe dla elemtlati asiyama Yesu Kelisota itiyamale tle pasakalo hamilalo Sokotapo dia:ye alikili dla eleme woyamuwapo. ³Epapele dulu dla aiyalma kokotapo dia:ye batalimale tle alikili dla eleme woyamoloweye po-ala:na. Adipalati, mota solotamale kokotapo aiyalma kokoye hopeyamale hamimduwapo. Amasiyama hatlo God tlo ala:le haluwapo, dia:ye batalimale dulu tle alikili dla eleme woyamoloweye. Epapedeme ya:tapo Yamiye oplami moto hapame ta:lamu dla tulune duwapo, di batalimale yilo popame ma dia:ye batalimale dulu tle alikili dla eleme woyamelepo depame. ⁴Epapedeme Godtapo koko iye dinapuwapo, aiyalmata atla koko hapulumaye Kelisota dia: yilo ala:po pustamhallepo depame. Epapele koko tle di mota solotamale koko dla podolumsiyamasema, amasiyama Sokota solotamale koko dla siyapapo.

⁵Epapedeme mota solotamale koko dla dolumsiyamalalo soye isikimi batalimale koko halomolowe tlo momalamalalo sopo. Amasiyama Soko dla dolumsiyamalalo soye isikimi Sokota solotamale koko halomolowe tlo momalamalalo sopo. ⁶Epapele dulu dla batalimale koko dla momalamale hatitipo siyamolowetapo dia: dla polowe hampuwapo. Amasiyama Sokota solotamale koko dla momalamale hatitipo siyamolowetapo dia: dla sadle koko mate epo pasakalo gadlowe koko mateye hampuwapo. ⁷Epapedeme mota solotamaleta elemsiyamalalo soye God mate opahale demha:ha:po. Adipalati, ipapele sotapo Godta aiyalma hatitimale dla salladepo dolumsiyamoloweye sikemte allimama aiyalma dolumolowe mape po-ala:po ha:ha:sema. ⁸Epapele koko tle Godtapo mota solotamale koko dolumsiyamalalo so tle siyele haloweye po-ala:na.

⁹Amasiyama epapele dulu dla mota solotamale kokotapo wua:ye dokopala depo pe-elemsiyamasema. Amasiyama God ya: Soko wua: dulu dla halatapo wua:ye dokopala depo elemsiyamapo. Epapedeme oplami antapo Keliso ya: Soko pa:le halema:, ya:ye po-Keliso ya: oplami ikadepe. ¹⁰Amasiyama Kelisota ikadepe wua: dulu dla halema dlepiye, wua: pasakalo hallowe halepe. Adipalati, Godta wua:ye ya: mila:pi tle mo-ullu pa:talo so duwapo. Epapele tlope wua: moto dla batalimale asiyamatapo polowe hampulupe. ¹¹Amasiyama Godtapo wua:ta palilati ya: Hela:dle Soko tle wua: palli motoye ma pasakalo dlepe. Adipalati, Yesu Kelisoye powale tle ma pasakalo duwa God ya: Sokoye wua: dulu dla halapo.

¹²Epapedeme mikadepe dle so namkadulo, wua:ta ase mota solotamale koko dla dostasiyamiya. ¹³Ame adipalati, wua: koko ipapele halomsiyamelepiye, wua: pallipe. Amasiyama wua: Sokota itiyamale tle wua:ta batalimale solotamale koko wua: dulu dla halaye yumilipiye, etapo wua: halepo halepo pasakalo halepe. ¹⁴Adipalati, opa anawoloye God ya: Sokota dokopala depo elemtama:, opa ewolotapo God ya: akimlala ikadepe depo ha:ha:po. ¹⁵Epapedeme Godta di watle Soko

hamiwaye wota:le soko pohamina. Amasiyama ya:ta di watle Soko hamiwata gadle tle ditapo ya: akimlala depo ha:ha:mama ya: watle “Aba,^a A,” demha:ha:po. ¹⁶Epame God ya: Sokotapo dita God ya: akimlala depo ha:ha: kokoye di dupa dulu dla atlemhalapo. ¹⁷Epedeme di God ya: akimlala depo ha:ha:deme koko hapuloma God tete depo halaye, e ma diolepo. Epedeme di yimkata Keliso mate koko hapuloma eye omha:ha:lowepo. Adipalati, di Kelisota wotiyalle hauwa ipi dita halepiye, eta di mape ya:ta hela:dle ipiye halepe.

Itapu dla hela:dle halowedeme ha:ha: koko

¹⁸Epapedeme dita wata oloma hema wotiyalle hamha:ha:ye pase koko pato. Amasiyama Godtapo di watle hela:dle hamilowedeme halaye pta pato. ¹⁹Epedeme Godta mimita:ple alisisi hapulomatapo solotamale mate Godta ya: akimlala ikadepe haliyamale dla eleme woyamolowe koko dla dalemha:ha:mama omha:ha:po. ²⁰⁻²¹Epapele dulu dla Godtapo ya:ta solotamale tle ya:ta mimita:ple alisisi hapulomaye polowe itiyamale mate epo hutuluwe itiyamale mate dulu dla ipila:uwapo. Amasiyama Godta ya: akimlala ikadepe haliyamale dla eleme woyamolowe alila oloma edla God ma meyelo ya:ta mita:ple alisisi hapulomaye polowe itiyamale tle epo hutuluwe itiyamale tle eleme alikili dla woyamelepe. Epame ya:tapo ya: akimlala ikadepe dla hamilowedeme dinapele hela:dle mepapeleye ma yia: watle hapilipe.

²²Epapedeme a:yatapo owayemala hamolowedeme wotiyalle natimdiye, epammama Godta mimita:ple alisisi hapulomatapo alila eta woyamolowe dla omha:ha:mama wotiyalle dulu dla ha:ha:po. ²³Amasiyama hatlo ya:ta mimita:ple alisisitapo alila eta woyamolowe koko dla po-omha:ha:sema. Amasiyama Hela:dle Soko watalo so di mape wotiyalle dulu medla sukalle mate ha:ha:mama alila eta woyamolowe koko dla omha:ha:po. Adipalati, Hela:dle Sokotapo itapu dla ela pasakaloye dia: dla imhalapo. Epapedeme alila oloma edla Godtapo di watle moto amko hapipame dia:ye ma ya: akimlala dlepe. ²⁴Epapedeme di watapo dita God ya: akimlala depo ma-ha:ha: kokoye isikimi dita mikadepe dle tle malamapo. Amasiyama alotle alila eta pulupiye, koko iye haliyamale dla natilipe. ²⁵Epedeme dita dalemha:ha:mama omha:ha: koko iye di ala ponatisema. Amasiyama di sadle mate itiyamale mate me-omha:ha:po.

Hela:dle Sokota dia: gademama inoma sumde koko

²⁶Epame dita hopeyamala natipame Hela:dle Sokotapo dia:ye gademdepo. Ame adipalati, di God dla ikadepe inoma sumoloweye

^a 8:15 Aba de ya: dulu kokoye Yu so yu mate a demama apopo.

podimalamana. Epapedeme Hela:dle Sokotapo dia: yilo God dla sikemte momalamale mate inoma sumdepo. Epapele tope ya:ta dia: yilo inoma sumde yu ya: dulu koko dita atloweye po-ala:na. ²⁷Amasiyama opa dupa dulu malastale Godtapo Sokota atlemde kokoye ya:malamana. Adipalati, Hela:dle Sokota God ya: opa yilo inoma sumama woloma Godta solotamale oloma dla himmdepo.

Godta ya: opa sesalemde koko

²⁸Epedeme dimalamana, adipapele koko hapuloma dulu dla Godtapo ya: sikemte malaha:ha: so dla ka:ka:dle koko tlo dinapomhalapo. Ame adipalati, God meyelo yu himili dolumama dia:ye ya:ta ya: akimlala depame ma-sesalemuwapo. ²⁹Epedeme Godtapo ya:ta sesalemale soye mo-powataliya malastapame haluwapo. Epame ya:tapo yia:ye ma-sesalemuwapo, yia:tapo ma ya: Maseyemala Yesu some ha:ha:lepo depame. Epapele dulu dla di natipo, Yesutapo God ya: opa hapuloma dulu dla itapu hamale maseyemala depo halemama ya: eidulo mate yotimadulo mate elemhalapo. ³⁰Epedeme Godtapo ya:ta sesalemale soye ma sisilamuwapo. Epame ya:ta sisilamale soye ma ullu pa:talo so duwapo. Epedeme ya:tapo ya: mila:pi tle ullu pa:talo so duwa dla ya:ta hela:dle ma hapiwapo.

Koko haletapo dia:ye Godta bokotiyapo malamale tle duka pogladlowa

³¹Epedeme di koko hema adipo atlepa:? Godta dia: mate halema dlepiye, oplami antapo dia: mate opahale demama dia:ye tla:mtapa:? Hawa. ³²Amasiyama Godtapo Yamiye dupa hohomama podatimana. Ame adipalati, ya:tapo Yamiye di batalimale yilo polopo depame isikimi me-hamiwapo. Godtapo Yami ikadepeye di watle hamilowedeme podatimalalo wekuwapo. Epapedeme Godtapo ma di watle alisisi hapuloma hapiloweye, ya: dla kokalle hale hawa ikadepe.

³³Epedeme Godta ma-sesalemale soye ma oplami antapo batalimale so depa:? Hawa. Adipalati, Godtapo yia:ye mo-ullu pa:talo so duwapo. ³⁴Epame matle oplami antapo Godta ma sesalemale so dia:ye Dlapa mo dla tlowe so depa:? Hawa. Adipalati, Yesu Keliso popo ma pasakalo depame ya: A dowala tiyama dla polomama dia: yilo inoma sumale himhalapo.

³⁵Epedeme apa kokota dia:ye Kelisota bokotiyapo malamale tle duka gladepa:? Kokalle koko mate epo wotiyalle koko mateta dia:ye Kelisota bokotiyapo malamale tle duka gladepa:? Hao. Epame daya pa:le koko mate epo alisisi dimi hallowe koko mateta dia:ye Kelisota bokotiyapo malamale tle duka gladepa:? Hao. Epame wota:le koko mate epo polowe koko mateta dia:ye Kelisota bokotiyapo malame tle duka gladepa:? Hao, pe-epapolowa. ³⁶Epedeme God yu bukatapo epo atlapo,

“Wa: yilo opatapo alila hapuloma dia:ye wotiyalle sikemte hapimha:ha:po.

Epame wa: yilo dia:ye eleme alinepi some mo-potimala tapo.”

³⁷Amasiyama kokalalimale koko hapuloma dulu hema ditapo di bokotiyapo malamalalo Godta itiyamale tle mo-tla:mtame ha:ha:po.

³⁸Adipalati, na:malamana, koko haletapo dia:ye Godta bokotiyapo malamale tle duka pogladlowa. Epapele dulu dla polowe koko mate epo pasakalo koko mateta dia:ye Godta bokotiyapo malamale tle duka pogladlowa. Epame banakaka so mate epo i-itiyamale soko mateta dia:ye Godta bokotiyapo malamale tle duka pogladlowa. Epame wata oloma hema koko wowoyamhala koko mate epo alotle wowoyamolowe koko mateta dia:ye Godta bokotiyapo malamale tle duka pogladlowa.

³⁹Epame omapla di dla alisisi hutiye mate epo ta:la isili hema hutiye alisisi matetapo dia:ye Godta bokotiyapo malamale tle duka pogladlowa. Epedeme ta:lamo pato dulu hema koko haletapo dia:ye Godta bokotiyapo malamale tle duka pogladlowa. Epapedeme Godta bokotiyapo malamale iye Yesu Keliso tle dia: dla botomastamhalapo.

Godtapo Isael soye ya: opa ikadepe depo sale

9 ¹⁻³Epedeme na:ye Keliso dulu dla halemama ikadepe kokoye wua: watle atlema. Epame na:ye isikimi pomala-atlasema. Hela:dle Sokotapo na:ye dokopala depo hallati na:tapo wua: watle atlemama na: opa Isael so yilo sikemte dupa kolle natima. Adipalati, ya:tapo Godta solotamale kokoye podolumasema. Epapedeme na:tapo yia: yilo Godta kasilamale dulu dla tloweye mo-dinapopo halapo.

⁴Epapele dulu dla Isael so opa iwoloye Godtapo ya: akimlala ikadepe duwapo. Epame ya:tapo yia: watle ya:ta hela:dle nati-iwapo. Epame ya:tapo Isael so mate yu itiyapo himili dulu dla yia:ye ya:ta sesalemale so depo ha:ha:lali aiyalma koko ma yia: watle hamiwapo. Epame yia: watle ikadepe api tle ya: hi di dla ta:demama ya: watle siyele hamilowe koko ma imuwapo. Epame yia: watle Kelisota alotle puluwe koko ma atlamuwapo. ⁵Epapele dulu dla yia: mamaduloye A:iblaham mate epo Aisek mate epo Yokob matepo. Epedeme Keliso mape opa iwolo yia: asiya dulu tle oplami moto hapame ta:lamo hema puwapo. Epapedeme Kelisoye Godpo. Epedeme ka:dena, opa hapulomatapo ya: dla kokó siyele ta:demha:ha:loweye. Adipalati, ya:tapo alisisi hapuloma yia: God halapo. Eye ikadepepo.

⁶Epedeme Godtapo Isael so mate yu itiyapo himiwaye ma-hauwokokomuwa? Hao, pe-epapena. Adipalati, Isael so dulu dla opa opiye pase Isael so opa ikadepe. ⁷Epame A:iblaham ya: mamadulo dulu dla opa opiye pase A:iblaham ya: mamadulo ikadepe. Adipalati, Godtapo A:iblaham watle epo atluwapo, “Wa: mamadulo ikadepeye hatlo

wa: maseyemala ikadepe Aisek tle pulupe,” duwapo. ⁸Epapedeme koko itapo epo nati-ipo, A:iblaham ya: mamadulo dulu dla opa opiye pase God ya: akimlala ikadepe. Amasiyama God ya: akimlala ikadepeye yu itiyapo himili maseyemala Aisekta hatitimale sopo. ⁹Adipalati, Godtapo A:iblaham mate yu itiyapo himimama epo atluwapo,

“Na:tapo sokomoko hale dla ma ilame pulupiye, Selatapo maseyemala hamelepe,” duwapo.

¹⁰Epapedeme maseyemala iye di mama Aisekpo. Ya:ta ta:po a:ya Lebeka hauwapo. Epame ya:llu Lebeka eta mopapo polopame akimlala dapiyamte hohomuwapo. ¹¹⁻¹²Epapele dulu dla yimlala dapiyamte iye ala pohohomalalo hallati Godtapo Lebeka watle epo atluwapo, “Wa: maseyemala patotapo ya: ei yemala yu dla heodepo salladepo sela:lepe,” duwapo. Epedeme Godtapo yia:ta dapiyamteta koko halomolowe ala yeitapo ha:ha:lali yu i tatile ma-atluwapo. Epedeme dita Godta ya: opa sesalemhala koko dla natiye, ya: dita koko halomha:ha: dla natipo po-apesema. Amasiyama ya: isikimi meyelo malapame dinapele tle sesalemhala. ¹³Epapedeme God yu bukata epo atlapo,

“Na: Yokob tlo sikemte malamama asiyama Iso tlo alimduwa,” depo.

¹⁴Epapele dulu dla di adipo atlepa:? Godye isikimi seme tiyape tlo gadlalo Godta:? Hao, ya: pe-epapesemde. ¹⁵Adipalati, Godtapo Moses watle epo atluwapo,

“Na: na:ta sesalemale so dla polowamale koko mate epo bokotiyapo malamale koko mate nati-imdepo,” duwapo.

¹⁶Epedeme Godta hulumale kokoye opata solotamale tle epo yia:ta koko halomde koko tle natipo po-apesemde. Amasiyama Godta isikimi meyelo bokotiyapo malamale tle oplamiye hulumhalapo. ¹⁷Epapedeme Godtapo Isip so yia: dokopala oplami dla epo atluwapo,

“Na:tapo wa: watle dokopala hi hamiwapo, isikimi wa: tle na:ta itiyamaleye opa hapuloma dla botomastlowedeme.

Epame na: hi mape opa hapulomata dlalemtlepo depo botomastlowedeme,” duwapo.

¹⁸Epapele dulu dla di natipo, Godye ya:ta sesalemale so dla polowamale koko mate epo bokotiyapo malamale koko mate himhalemdepo. Amasiyama ma opa opi dla mikadepe dlowe dla dupa kokalalimolowe kokoye hapimhalapo.

Godta kasilamale koko mate epo bokotiyapo malamale koko mate

¹⁹Epedeme oplami haletapo na: watle ipo atlanatilowe sepena, “Godtapo meyelo opa opi dla mikadepe dlowe dla dupa kokalalimolowe koko hapimhalema dlepiye, ya: ma adipammama opa ewoloye batalimale so depa:?” ²⁰Amasiyama namkale, wa:ta ipapele atlanatili God dla

atloweye poka:dena. Ame adipalati, wa:ye isikimi ta:la oplamipo. Epedeme nasama yu ipo. Dulitapo yo duli tilalo a:ya watle atlemama, “Wa: adipalati na:ye ipo tima:?” dlowe poka:dena. ²¹ Adipalati, duli tilalo a:ya yo dla itiyamale elapo, ya:tapo duli hale tlo isikimi alila hapuloma dulu dla asiyamta demsela:lowe timama asiyama duli hale tlo isikimi koko dla tamama asiyamta demsela:lowe tiloweye.

²² Epapele dulu dla God ma epamhalapo. Ya: dla itiyamale elapo, ya:ta siyaladle mate itiyamale mate opa dla nati-iliweye. Epapele tlope ya:tapo ya:ta alilalo sota mo-polowe api dla tamha:ha:lali natipame hapele yia: batalimale asiyama pohamilalo, sadle mate yia:ye me-omhalapo. ²³ Epame ya: dla itiyamale me-elapo, ya:tapo ya:ta bokotiyapo malamalalo so dla ya:ta hela:dle koko nati-iliweye. Ame adipalati, opa ewoloye ya: meyelo ma-sesalemuwapo, ya:ta hela:dle dla ulatumellepo depame. ²⁴ Epapedeme Godtapo opaye ya:ta hela:dle dla ulatumellepo depame sesalemama hatlo Yu so siyapo tlo posesalemana. Amasiyama ya: po-Yu so opa mape sesalemuwapo. Epedeme ya:ta sesalemale so opa ewoloye dia:po. ²⁵ Godtapo po-Yu so koko dla Hoseya buka dla epo atluwapo,

“Na:tapo ka:yapa pona: opa dlalo haluwa opa ewoloye watapo ma na:ta na: opa dlowepo.

Epame opa anawoloye na:ta pobokotiyapo malamalalo haluwa opa ewoloye ma watapo na:ta bokotiyapo malamolowepo,” duwapo.

²⁶ Ka:yapa Godtapo yia: watle atlemama,

“Wua:ye pona: opa ikadepe,” duwapo.

Amasiyama ma ya:tapo yia: watle atlemama,

“Wua:ye pasakalo hallalo God ya: akimlala dlepe.”

²⁷ Epame Aisayatapo Isalael so koko dla ma epo atluwapo,

“Isalael sota sikemte pasatamama asila some hallepe.

Amasiyama dulu edla isikimi opihatatapo pasakalo gadle halepe.

²⁸ Ame adipalati, Lodtapo ta:lamo hema ya:ta hali depo atlale kokoye woloma ma-halepe,
ya: powelilowa.”

²⁹ Epame Aisayatapo mamisika: Isalael so koko dla epo atluwapo,

“Itiyamale Lodtapo dia: dulu dla opi pogadlalo wekematiye,

dia:ye Sodom mo mate epo Gomola mo mate dlapata hamdemama opa hapuloma poyuli epapelemla.”

Isalael sota pomikadepe dle koko

³⁰ Epapedeme na:ta atlamale yu ya: dulu kokoye ipo elema. Po-Yu so opatapo yia:ta God mila:pi tle ullu pa:po ha:ha:lowe kokoye pototamana. Amasiyama miyelo yia:ta mikadepe dle koko tle Godtapo yia:ye ya:

mila:pi tle ullu pa:talo so duwapo. ³¹Amasiyama Isalael sotapo God mila:pi tle ullu pa:talo so depo ha:ha:lowe kokoye totamama yia: aiyalma koko tlo sikemte dolumha:ha:uwapo. Amasiyama koko etapo yia:ye po-ullu pa:talo so dena. ³²Adipalati, yia:tapo mikadepe dle pa:le, isikimi miyelo itiyamale tle God mila:pi tle ullu pa:talo so dlowedeme apuwapo. Epele koko tle yia:tapo opata kustamtame teteyulalo ewala dla kustamtame teteyumha:ha:uwapo. ³³Adipalati, God yu bukata ipo atlapo, “Na:tapo Sayon mo dla ewalaye pamellowepo.

Ewala edla opatapo kustamtame teteyumha:ha:lepe.

Amasiyama oplami antapo ya: dla mikadepe dlepiye, ya: wota:le ponatimhallowa.”

10 ¹Epedeme mikadepe dle so namkadulo, na:tapo na: dupa dulu tle Isalael so yilo sikemte inoma sumale pato himhalemde, yia:tapo pasakalo gadle halepo depame. ²Isalael so yia: sikemte solotamde God dolumtlowedeme, amasiyama dulu edla yia: ikadepe api tle God dolumtloweye poyia:malamana. ³Epedeme yia: mape Godta meyelo opaye ya: mila:pi tle ullu pa:talo so demhalaye poyia:malamana. Amasiyama yia: miyelo itiyamale tle God mila:pi tle ullu pa:talo so dlowa depo yia: aiyalma dolumha:ha:ta yia: pogadesema. Epapele koko tle yia:tapo ikadepe God mila:pi tle ullu pa:talo so depo ha:ha:lowe koko haloweye posolotamasema. ⁴Adipalati, Kelisotapo aiyalmata halopo puwa koko hapulomaye dia: yilo ma-ala:po guduwapo. Epapedeme oplami antapo Keliso dla mikadepe dlepiye, asiyama Godtapo ya:ye ya: mila:pi tle ullu pa:le oplami dlepe.

Ka:dle yutapo pasakalo gadle kokoye hampuwapo

⁵Epapedeme aiyalmata hampuale ullu pa:po hallowe koko dla Mosestapo epo atluwapo, “Oplami antapo me-pasakalo hali dlepiye, ya: aiyalma koko hapulomaye woloma dolumhallepe,” duwapo. ⁶Amasiyama mikadepe dle kokota hampuale ullu pa:po hallowe kokotapo epo atlapo, “Poka:dena, opatapo Kelisota yia: gadlepo depame Pepele dimo dla Keliso totamala hetloweye. ⁷Epame ma poka:dena, opatapo Kelisota yia: gadlepo depame tame wabasi dulu dla ya: totamsiyamoloweye,” depo. ⁸Adipalati, isikimi hatlo Keliso dla mikadepe dlowe koko siyapota pasakalo gadlowe kokoye hampumhalapo. Adipalati, God yu bukata epo atlapo, “God ya: yuye wa: mateka:pi dla halapo.

Epame yu eye wa: mati dla epo wa: dupa dulu dla elapo.”
Epedeme mikadepe depo hallowe yu eye dita atlamsiyamapo.

⁹Epedeme wa: wa: mati tle Yesuye Lodpo depo botomastapame ma ya:ye Godta ma powale tle ma pasakalo dle koko dla mikadepe dlepiye, wa:ye pasakalo gadle halepe. ¹⁰Adipalati, wa: dupa duluta mikadepe dle koko tle Godta wa:ye ya: mila:pi tle ullu pa:le oplami demhalapo. Epame

wa: mati tle Yesuye Lodpo depo botomastlepiye, etapo wa:ye pasakalo gadle kokoye halepe. ¹¹ Adipalati, God yu bukatapo epo atlapo,

“Oplami antapo Keliso dla mikadepe dlepiye, ya: wota:le ponatimhallowa,” depo.

¹² Epapele koko dulu dla di natipo, Yu so mate epo po-Yu so mateye ma-hatlopepo. Adipalati, di Lod ma hatlopepo. Epapele koko tle ya:tapo ya: watele otele himha:ha: so dla ka:ka:dle koko hapuloma halopimhalapo.

¹³ Adipalati, God yu bukatapo epo atlapo,

“Oplami antapo gadle yilo Lod dla otele himhallepiye, ya:ta pasakalo gadle kokoye halepe.”

¹⁴ Epapele dulu dla opata God dla pomikadepe dlalo wekematiye, yia: adipammama pasakalo gadlowe yilo ya: dla otele himpa:? Epame yia:tapo ya: koko podlallalo wekematiye, yia: adipammama ya: dla mikadepe depa:? Epame ka:dle yuye yia: dla po-atlamalalo wekematiye, yia: adipammama God yu dalepo hapa:? ¹⁵ Epame ka:dle yu atlamalalo soye potaiya dlalo wekematiye, yia: adipo God yu atlamsiyamelemo? Epapedeme God yu bukatapo epo atlapo,

“Ka:dle yu hamsiyamalalo sotapo ka:dle yu hame pula natiloweye pta ka:pi.”

¹⁶ Amasiyama dulu edla pase opa hapulomatapo pomikadepe dena. Yu iye Aisayatapo God yu buka dla epo atluwapo,

“Lod, di yuye opa anawolota mikadepe duwa?”

¹⁷ Epapedeme ka:dle yu Yesu Keliso koko dallowe kokotapo mikadepe dlowe kokoye hampuapo. ¹⁸ Epapele dulu dla Isalael soye adipapopa:? Yia: ka:dle yu mo-daluwa? Yao, yia: ma-dlaluwapo. Adipalati, God yu bukata epo atlapo,

“Ka:dle yu hamsiyamalalo sotapo ka:dle yuye ta:lamu pato dla tame opa hapuloma dla ma-atlamtauwapo.”

¹⁹ Amasiyama Isalael sotapo ka:dle yu iye dalepame malamale hauwa? Yao, yia: malamale hauwa tlope, woloma pomikadepe dena. Epedeme Mosestapo epo ilimuwapo,

“Godtapo epo atluwapo,

‘Na:tapo po-Yu so dla gadle himhallati
ma wua:tapo yia: dla elle himha:ha:mama yia: dla
siyalasiyalademha:ha:lepe.’ ”

²⁰ Epame Aisayatapo Godta atlamale yu iye wota:le pa:po epo atluwapo,

“Opa na: pototamha:ha:lalo wekele sotapo na:ye ma-natiwapo.
Epame na:tapo na: pototamalalo wekele so dla naskamu na:
kokoye nati-iwapo.”

²¹ Amasiyama Godtapo Isalael so dla epo atluwapo,

“Na: alila hapuloma dulu dla wua: elemolowedeme ma-dinapopo halemduwapo.”

Amasiyama muwolo dupa kokalalimale koko tle na: yu dla dalepo salladla allimduwapo.”

Isalael soye Godta powelina

11 ¹Epapedeme na:ta atlama koko iye Godta ikadepe ya: opa Isalael soye alimama alikili a:ma pomoluwa? Hao, pe-epapena. Ame adipalati, na: mape Isalael oplamipo. Epame na: mape A:iblaham ya: mama hale, Benyamin elele dulu dla halapo. ²Epapedeme Godtapo ya:ta mo-powataliya sesalemale soye alimama alikili a:ma popomelena. Epapele dulu dla wua: God yu buka dla Ilayata atlamale kokoye malamaiya. Adipalati, ya:tapo Isalael so koko dla kokoliyemhalemama God dla epo atluwapo, ³“Lod, Isalael so opa iwolotapo wa: tle yu hapame molo atlamalalo soye potipame ma God dla namkale dle alinepi poyupo halomalalo tile mape dodokotimuwapo. Epammama God tle yu hapame molo atlalo oplami hatlo na: tlo me-pomoluwapo. Amasiyama yia: na: ma me-yumuluwedeme apopo,” duwapo.

⁴Amasiyama Godtapo Ilaya yu ipi dla adipo atluwa? Epapele dulu dla ya:tapo Ilaya watle epo atluwapo, “Na: dla mikadepe dlalo oplami hatlo wa:ta pohalasema. Adipalati, na: dla 7,000 opa me-ha:ha:po, yia:ye biskapa god Bal demde dla poheodesemde,” duwapo.

⁵Epapedeme wata oloma hema ma mepo elapo, pase Isalael so opa hapulomatapo God tle alikili a:ma popotana. Amasiyama Isalael so opi tlope ya:ta bokotiyapo malamale tle yia:ye mo-huhulumuwapo, yia:tapo ya: dla mikadepe dlepo depame. ⁶Epapedeme Godtapo ya:ta bokotiyapo malamale tle ya: opaye mo-huhulumdepo. Epapele dulu dla yia:ta ka:dle koko halomha:ha:lata po-apesemde. Ame adipalati, Godta opa huhulumde kokoye isikimi opata ka:ka:dle koko halomha:ha:lata ammde dlepiye, eta asiyama ya:ta bokotiyapo malamaleye koko pa:le ellemla.

⁷Epapedeme Isalael sotapo yiskamu yia:ye God mila:pi tle ullu pa:po ha:ha:lowedeme sikemte itiyamuwapo. Epapele tlope yia: koko iye pohana. Amasiyama isikimi Godta huhulumale so tlo ya:tapo ya: mila:pi tle mo-ullu pa:talo so duwapo. Amasiyama opa opi tlo God yu dalla allimama yia: dupa kokalalimuwapo. ⁸Adipalati, God yu bukata Isalael so koko dla ipo atlapo,

“Godtapo yia: watle malamale yeitamale hapiwapo,
yia:tapo pomalamalalo wekelepo depame.

Epame Godtapo yia: inomaye mo-hihimamuwapo,
yia:tapo ponatilalo wekelepo depame.

Epame ma ya:tapo yia: moloye mo-hihimamuwapo,
yia:tapo ma podallalo wekelepo depame.

Epapedeme ipapele kokotapo ala me-elemtamama wata oloma hema
ma me-elapo.”

- ⁹Epapele dulu dla Deibidi mape yia: koko dla ma epo atluwapo,
 “Miyelo solotapo koko halomha:ha: koko etapo
 yiskamu yia: hohomolowe dea susumale some ha:ha:lepe.
 Epame yia:tapo edla gogodepo teteyupo hutiyemama
 yia: batalimale asiyama halomha:ha:lepe.
¹⁰Epedeme yia:ta ma natilala depame
 yia: inomaye hihimamelepe.
 Epame yia:tapo poutame siyamelepo depame
 yia: watle upiyele didiyemellepe.”

Po-Yu sota pasakalo gadle halowe koko

¹¹Epedeme na: matle ipo atlema, Yu sota Keliso alliwa kokotapo yia:ye mosukulu batalipo hamastauwa? Hao, pe-epapena. Adipalati, yia: batalimale etapo po-Yu so dla pasakalo gadle kokoye hampuwapo. Epela natipame Yu sotapo ma po-Yu so dla elle himha:ha:uwapo. ¹²Epedeme Yu sotapo api hotale kokota po-Yu so opa dla gadle kokotapo puwapo. Amasiyama Godta Yu sotapo yia:ta api hotale tle ma God hala dla pumullupiye, oloma edla asiyama po-Yu sotapo pasakalo gadle sikemte ma-a:ma patoye halepe.

¹³Epedeme na: matle wata oloma hema ma po-Yu so wua: dla atlema, na:ye po-Yu so wua: yilo Taiya dle oplami depo halapo. Epapedeme na:tapo Godta na: watle hamili oko i tlo siyele mate hamhalapo.

¹⁴Epedeme pona:malamana, na:ta po-Yu so mate epo oko hala natipame asiyama na: opa ikadepe Yu sotapo na: eledomama na: hala dla pumulluwe sepena. Epapelepiye, eta na:ta yia: pasakalo gadlowepo.

¹⁵Epedeme Godta Yu so tle alikili a:ma kostauwatapo ta:lamo soye ya: mate namkale depame ya: hala dla elempuwapo. Epapedeme Godta Yu soye ma alotle hohomelepiye, ya:tapo palli soye ma pasakalo depame haliyamale dla elempuale some halemama apelepe. ¹⁶Epedeme wua: natiya, wua:tapo daya yekalo dla atili tle yimka:mala polame God watle hamilita aiyalma dlepiye, daya yekalo dla atili pato mape ma aiyalma depo. Epame dali mape epapena. Dali hala sitalitapo kese woloma ka:depo tutula:po hallepiye, ya: dlo di mape ka:depo hallepe.

Olipi dlomoko dali dla wayu atlale

¹⁷Epedeme Yu soye olipi dlomoko dali emale dlo epapele some ha:ha:po. Epalati asiyama po-Yu soye moku dla hallalo olipi dlomoko dali dlo epapele some ha:ha:po. Epapeleye Godtapo emale olipi dlomoko dali dloye ketamastapame ma asiyama moku dla hallalo olipi dlomoko dali dloye ketahame puame gugouduwapo. Epapedeme po-Yu oplami wa:ye epapele some halapo. Godtapo wa:ye emale dali dla mogouduwapo. Epalati asiyama olipi dlomoko dali emale etapo wa: dla

pasakalo hamimhalapo. ¹⁸ Amasiyama po-Yu oplami wa:, wa: emale olipi dlomoko dali dlota epo kotipo alikili dla hutiyelati ma wa:ta yia: mo dla gugoudepo hala koko dla ase wa:skamu di dla hame hetama halemiya. Adipalati, wa:tapo gugoudepo hala dali sitali pohalasema. Amasiyama wa: isikimi ya: dlo dla gugoudepo halapo. ¹⁹ Epedeme wa: asiyama ipo atlowe sepena, “Na:ta yia: mo halepo depame dlomoko dali dlo ewoloye mo-kotipo alikili dla pololuwapo.” ²⁰ Epapele dulu dla wa:ta atlaye ikadepepo. Adipalati, Yu sota mikadepe dle pa:po ha:ha:lali natipame dali dlo epapele some alikili dla mo-kotipo pololuwapo. Epalati wa:ta mikadepe dle tle dali dlo kestale ipi edla tame mo-gugouduwapo. Epedeme wa: koko edla wa:skamu ase sikemte di dla hame hetamiya. Amasiyama wa: wota:le mate halane. ²¹ Adipalati, Godtapo dali ya: dlo ikadepeye kotipame alikili dla pololuwa, epammama wa:ta pomikadepe dlalo hallati wa: mape mepo kestepo alikili dla hamastlepe.

²² Epapedeme di natipo, Godye sikemte bokotiyapo malamalalo Godpo, epame batalimale koko dla sikemte alilalo Godpo. Epapedeme ya:tapo Yu so opa opi ya: tle alikili a:ma tale so dla posiyemhalasema. Amasiyama wa:tapo ya: dla mikadepe depame ya:ta bokotiyapo malamale dulu dla hallepiye, Godtapo asiyama wa:ye sikemte bokotiyapo malamhalapo. Amasiyama wa:tapo ya:ye pomikadepe dlalo hallepiye, Godtapo wa: mape dali dlo some ketamastlepe. ²³ Epapele dulu dla Yu so ma God dla mikadepe dlepiye, Godtapo matle yia:ta ha:ha:lalo emale dali dlo dla ma-tame gugoudlepe. Epedeme koko i halowepe God dla itiyamale me-elapo. ²⁴ Epedeme po-Yu so wua:ye moku dla hallalo olipi dlomoko dali dlo ketahame ma olipi dali emale dlo dla tame gugoudle some halapo. Amasiyama Yu soye olipi dali emale e ya: dlo ikadepe ha:ha:po. Epapedeme God ya: dla pokokalena, ya:tapo olipi dali emale dlo ikadepeta kotipo alikili dla pololleye ma ilame yia:ta ha:ha:lalo ikadepe dla gugoudepo mellowepe.

Isael soye ma ilame God hala dla eleme puluwe koko

²⁵ Epedeme mikadepe dle so namkadulo, hemele hatiyomeleme ela kokoye na:ta wua: watile haliyamale dla atlowama, eta wua:tapo wuskamu di dla pohalopo hehetamha:ha:lalo wekelepo depame. Epapele dulu dla hemele hatiyomeleme ela kokoye ipo, Isael so opa opitapo pomikadepe dlalo dupa kokalalipo me-ha:ha:mtlati po-Yu so opa opi Godta mo-powataliya ma-sesalemale sota ma God hala dla pumullupe. ²⁶ Epame yia:ta hapulomata mo-pumulla natipame asiyama Isael so opa hapulomatapo pasakalo gadle kokoye halepe. Adipalati, God yu bukata epo atlapo, “Pasakalo gadlalo oplamiye Sayon mo tle pulupe.

Ya:tapo Isael sota batalimale koko halomha:ha: hapulomaye alikili a:ma hamastlepe.

²⁷ Epame na:tapo monolo yu itiyapo himili e dolumama yia: bobtalimaleye hihiyotipo welliwepo,” depo.

²⁸ Epedeme wata oloma hema Yu so opa opitapo ka:dle yu dla allimama God mate opahale demha:ha:po. Epapele koko tle ka:dle yu etapo po-Yu so wua: dla puapo. Amasiyama epapele tlope Yu soye God meyelo sesalemale so opa ikadepepo. Adipalati, Yu sotapo ikadepe God ya: opa depo ha:ha:lowe kokoye Godtapo yia: mamadulo ka:yapa ha:ha:uwa so mate yu itiyapo me-himiwapo. Epapele koko tle Yu sotapo Godta dupa ellalo so ha:ha:po. ²⁹ Adipalati, God ya:ye ya:ta ya: opa ikadepe depo sesalemale koko mate epame ya:ta hapili koko mate dla ma malamale pomeyelope desemde.

³⁰ Epedeme po-Yu so wua:ye ka:yapa Godye alimha:ha:uwapo. Amasiyama ma Yu sota Godye allilati asiyama Godtapo ya:ta bokotiyapo malamaleye ma po-Yu so wua: dla hamiwapo. ³¹ Epedeme wua:ta ka:yapa God yu allimha:ha:uwaye, epammama watapo ma Yu sotapo God yuye allimha:ha:po. Amasiyama Godta wua: dla ya:ta bokotiyapo malamale koko hamiwaye, epammama alotle Yu so dla ma mepo hamilipe. ³² Epapedeme Godtapo opa hapulomaye batalimale koko dulu medla me-pomoluwapo, alotle ya:ta bokotiyapo malamale kokoye yia: dla nati-iliwedeme.

God hi di dla ta:diya

³³ Epedeme Godta malamaleye pta pato epo pta ga:tluna, oplamitapo ya:ta malamale mate epo ya: koko mate malamoloweye po-ala:na.

³⁴ “Oplami antapo Lodta malamale sitali malastapa?: Epame oplami antapo ya: imolowe ala:ta:?”

³⁵ Epapedeme oplami antapo Godta ya: watle alisisi hamilipo depame ya: tatle God dla alisisi hamiwa? Hawa ikadepe.”

³⁶ Adipalati, alisisi hapulomaye isikimi God tle dia: dla pumhalapo. Ame adipalati, alisisi hapulomaye meyelo mimita:pame ya:ole duwapo. Epedeme opa hapulomatapo isikimi alila hapuloma hatlo ya: hi tlo di dla ta:demha:ha:lowe tlo ka:pi. Eye ikadepepo.

Wua: motoye God watle halopiya

12 ¹ Epedeme mikadepe dle so namkadulo, Godtapo di watle bokotiyapo malamale pato ma nati-iwapo. Epapedeme na: solotama, wua:tapo wua: motoye pasakalo halemhala ullu pa:le alisisi epapele some God watle halopiya. Adipalati, ipapele koko tle God dla siyele hamiloweta ka:pi halapo. Epalati asiyama ya:tapo wua: dla siyemhallepe. ² Epapedeme wua: ta:lamo kokota wua:ta malamaleye meyelo de demiya. Amasiyama Godta wua:ta malamaleye meyelo de diya. Wua:ta epapelepiye, eta wua: Godta solotamale kokoye sikemte

malastlepe. Epame wua: dla ka:dle koko malamolowe mate epo ya: dla siyele hamilowe koko mate epame ka:depo hallowe koko mateta hutiyelepe.

³Epedeme na:tapo God ya:ta tane dle oplami depo halemama yu iye wua: watle atlema. Wua: wuskamu di dla halopo hehetamha:ha:miya. Amasiyama Godta wua: watle halopiwa mikadepe dle koko mate ala:mama wuskamu wua: woloma natiya. ⁴Epedeme di moto dla u-ulalimale meyelope meyelope dleta ha:ha:po, epame yia: oko mape meyelope meyelope dlepo. ⁵Epapele dulu dla di mape Keliso dulu dla mepo ha:ha:po. Dita hapulomatapo Keliso dulu dla moto hatlope depo ha:ha:mama asiyama gade asiyama gade dle oko halomha:ha:po.

⁶Epapedeme Godta dia:ye bokotiyapo malamale tle Sokotapo di watle isikimi namkale dle tle hapimhala koko meyelope meyelope dleye dia: dla me-hutiyepo. Epapele dulu dla wa: dla God tle yu hapame molo atlowe oko hamili hallepiye, wa:ta mikadepe dle mate ala:mama yu mepo atlemhallepe. ⁷Epame wa: dla sos dulu dla salladle oko halowe hamili hallepiye, wa: mepo sos dulu dla salladle oko hamhallepe. Epame wa: dla God yu atlowe oko himili hallepiye, wa: mepo God yu atlemhallepe. ⁸Epame wa: dla ya:mkale gadle yu mate itiyamale hamilowe oko hamili hallepiye, wa: mepo yimkaduloye gadle yu mate itiyamale hapimhallepe. Epame wa: dla isikimi namkale dle tle yimkadulo dla hapimhallowe oko hamili hallepiye, wa: mepo hapimhallepe. Epame wa: dla dokopala depo hallowe oko hamili hallepiye, wa: mepo dokopala depo halemama oko ka:pi halepe. Epame wa: dla atali so gadlowe oko hamili hallepiye, wa: mepo atali soye siyele mate gagademhallepe.

Mikadepe dle sota ha:ha:lowe koko

⁹Epedeme mikadepe dle so namkadulo, ikadepe api tle ya:mkale asiyama bokotiyapo malama ya:mkale asiyama bokotiyapo malama demha:ha:iya. Epame batalimale koko tlo allimama asiyama ka:dle koko tlo woloma kikitilata hamaiya. ¹⁰Epame wua: ase wuskamu wua: tlo di dla halopo hehetamha:ha:miya. Amasiyama wua: amkadulo tlo sikemte malamama yia: tlo di dla halopo hehetamha:ha:iya. ¹¹Epedeme wua: Lod oko hamama hopeyamale mate halomiya. Amasiyama wua: dupa dulu hutulli mate epo Sokota itiyamale mate ya: oko haiya. ¹²Epapedeme Godtapo wua: watle hamilowe pasakalo dla sisiyele mate dalemha:ha:mama omha:ha:iya. Epame wotiyalle upiyele dulu medla kokalalipo ha:ha:iya. Epame alila hapuloma dulu dla inoma sumha:ha:iya. ¹³Epapele dulu dla mikadepe dle sotapo adipo kokalle koko dulu dla tulume ha:ha:lepiye, wua: yia:ye gadlepe. Epame mikadepe dle sota asepe pulati yia:ye woloma gadlepe.

¹⁴Epame opa opitapo wua: dla wotiyalle hamilati wua: epalati asiyama Godta yia: watle wotiyalle hamilipo depame ya: atlemiya. Amasiyama

isikimi yia: gadlepo depame God dla atlaiya. ¹⁵Epame sisiyele dulu dla ha:ha: so mate hatlope depame sisiyemha:ha:iya. Epame dupa kolle dulu dla ha:ha: so mate hatlope depame dupa kolle dulu dla ha:ha:iya. ¹⁶Epapele dulu dla wua: amkadulo mate woloma sadepo ha:ha:iya. Epame ase wua: tlo malamale sikemte pato halomana depame wuskamu di dla halopo hetamiya. Amasiyama wuskamu isili dla halopo tutula:pame koko yeitamale so mate hatlope dloweye allimiya.

¹⁷Epedeme opa opitapo wua: watle batalimale koko halati asiyama yia: watle batalimale kokoye nati-idemha:ha:miya. Amasiyama opa mila:pi tle isikimi ka:ka:dle koko tlo halomha:ha:iya. ¹⁸Epapele dulu dla opa hapuloma mate woloma sadepo ha:ha:lowe koko tlo sikemte itiyamaiya.

¹⁹Epapedeme mikadepe dle so namkadulo, opa opitapo wua: dla batalimale halati asiyama batalimale mepapele mate yia: watle hamimiya. Amasiyama God watle pomeliya. Adipalati,

“Lodta epo atlema,

‘Na:tapo opa dla yia: batalimale asiyama hamilalo halapo.’”

²⁰Amasiyama wua: koko ipapeleye haiya,

“Wa: dla opahale dlalo oplamita daya ta:mpollati

wa: ya: watle daya hamine.

Epame ya:tapo yú ta:mpollati

ya: watle yú tipo hamine.

Epapele dulu dla wa:ta epapelepiye,

asiyama ya:tapo ya:skamu ya: batalimale kokoye malanatipame wota:lepe.”

²¹Epedeme batalimale kokota wua:ye tla:mta demiya. Amasiyama wua: ka:ka:dle koko tlo halomha:ha:mama batalimale kokoye yumiya.

Gamani so yu dla salladepo siyamaiya

13 ¹Epapedeme ka:dena, opa hapulomatapo gamani so dla heodepame yia: yu dla salladepo siyamoloweye. Adipalati, gamani so hapulomaye miyelo solotamale tle mo edla dokopala depo popopa:sema. Amasiyama Godtapo itiyamale hamilati yia: mo edla dokopala depame popa:po. ²Epedeme opa anawolotapo gamani yu dla heodlowe dla allimha:ha:ma:, yia: mape God dla heodlowe allimha:ha:mama apopo. Epapele koko tle yia: batalimale asiyama halepe. ³Epapele dulu dla ka:ka:dle koko tlo halomha:ha:lalo sotapo gamani soye powowota:mha:ha:sema. Amasiyama batalimale koko halomha:ha:lalo sotapo gamani soye wowota:mha:ha:po. Epedeme wua: gamani so powota:lalo ha:ha:lowa dlepiye, wua: ka:dena, isikimi ka:ka:dle koko tlo halomha:ha:lepe. Epalati gamani sotapo wua: natipame sisiyelepe. ⁴Epapedeme gamani soye Godtapo mo edla ipila:uwapo, yia:tapo wua:ye gademha:ha:lepo depame. Epapele dulu dla wua: batalimale koko halepiye, wua: wowota:lowe ka:pi. Adipalati, Godtapo yia: watle itiyamale ma-

hamiwapo, yia:tapo wua: wadle wua: batalimale asiyama hapimha:ha:lepo depame. ⁵Epedeme wua: batalimale asiyama halala depame gamani dla heodepame yia: yu dla salladepo siyamaiya. Adipalati, wua:malamana, koko eye ka:dle kokopo.

⁶Epapedeme gamani sotapo Godta yia: wadle oko hapiliye woloma ka:pi halomha:ha:lepo depame ta:kis mani hatitimha:ha:iya. ⁷Epedeme gamani so tete hapulomaye gamani so wadle halopiya. Epame yia: yu dla heodepame salladepo siyamaiya.

Wua: amkadulo sikemte bokotiyapo malamha:ha:iya

⁸Epedeme wua: amkadulo dla alisisi isikimi yepa:ta halomha:ha:miya. Amasiyama wua: amkadulo mate asiyama bokotiyapo malama asiyama bokotiyapo malama demha:ha:iya. Wua:ta epamha:ha:lepiye, eta wua: aiyalma koko hapulomaye ala:po pustamha:ha:mama apelepe. ⁹Adipalati, aiyalma opiye ipo hutiyepo, upo a:ya mate epo upo oplami mate uhala aiyalma, epame ya:mkale yumula aiyalma, epame upo alisisi uhala aiyalma, epame ya:mkale alisisi halowedeme sikemte solotamale himila aiyalma. Epame aiyalma opi ma me-hutiyepo. Amasiyama aiyalma hapuloma iye aiyalma hatlope dulu hema bopudepo halapo. Eye,

“Wa:tapo wa:skamu sikemte bokotiyapo malamhalem diye,
epammama wa: amkadulo mape epo sikemte bokotiyapo
malamhalane.”

¹⁰Epedeme bokotiyapo malamale koko dulu dla ya:mkale dla upiyele mate epo wotiyalle mate hamilowe pe-elasema. Adipalati, bokotiyapo malamale kokotapo aiyalma koko hapulomata atlamale kokoye ala:po pustamhalapo.

¹¹Epedeme na:ta ala atlama koko iye halomha:ha:iya. Adipalati, dia:ye mosukulu alila dla ma-ha:ha:po. Epedeme hutiyele tle ma silliya. Ame adipalati, dita ka:yapa mikadepe duwa oloma edla pasakalo gadle kokoye pateka:mu dla eluwapo. Amasiyama watapo mo-mateka:pi dla puapo. ¹²Epapele dulu dla utula:latapo ma-alallowe mateka:pi dla hallati ma asiyama alilatapo ma-alalempuapo. Epapedeme di ka:dena, amtuwale dulu dla batalimale koko halomha:ha:mdiyeme melepepame ma hela:dle dla ha:ha:mama koko halomha:ha:lowe tlo dinapolowa. ¹³Epedeme di woloma alila hela:dle dla ha:ha:lalo so some woloma ka:depo ha:ha:lowa. Amasiyama poka:dena, ditapo kawata yú dele dulu dla, epo wola: uhalomolowe koko dulu dla, epo yu topulolle mate epo natalimale koko dulu dla, epo ya:mkale ellewe koko dulu dla ha:ha:loweye. ¹⁴Amasiyama dulu edla Lod Yesu Kelisotapo wua: pasakaloye omhala diya. Epame wua:ta mota solotamale koko halomde api ma himomeliya.

Wa: amkale mikadepe dle oplami dla batalipo atlemiya

14 ¹Epedeme wua: dulu dla mikadepe dle pase kokalalimale soye allimha:ha:miya. Epame yia:ta momalamale meyelope meyelope

dle koko natipame yia: atlemiya. ² Adipalati, mikadepe dle oplami haletapo ya:ta malamaleta alisisi hapuloma dloweye ka:pi demdepo. Amasiyama mikadepe dle pase kokallalo wekele oplami haletapo ya:ta malamaleta alinepi mo dloweye aiyalma demdepo. ³ Epedeme dlowe alisisi hapuloma dlowe me-ka:pi dlalo oplamitapo ma mo dlowe tlo aiyalma dlalo oplami dla alliwe poka:dena. Epalati ma asiyama mo dlowe tlo aiyalma dlalo oplamitapo alisisi hapuloma dlalo oplamiye batalimale oplami dlowe poka:dena. Adipalati, Godtapo alisisi hapuloma dlalo oplamiye pobatalimana demhalasema. ⁴ Epedeme wa: dla itiyamale hawa, ya:mkale oko oplamiye batalimana dloweye. Adipalati, hatlo ya: dokopala oplamitapo meyelo ya: oko oplami kokoye gladlepe. Epalati oko oplamitapo Lodta gadle itiyamale tle ya: okoye woloma ka:pi halepe.

⁵ Epame ma alila koko dla oplami haleta epo atlowe sepena, alila hatlope tlo pta aiyalma demama asiyama alila opi tlo aiyalma pa:na, dlowe sepena. Epalati asiyama oplami haleta atlemama, alila hapulomaye ma hatlopepo, dlowe sepena. Epapele dulu dla ka:dena, koko hema opa hapulomatapo isikimi miyelo malamale tle ha:ha:lowe tlo ka:pi. ⁶ Adipalati, alila hatlo tlo aiyalma dlalo oplamitapo, ya: Lod malamama ammdepo. Epame alisisi hapuloma dlalo oplamitapo ya: Lod malamama alisisi hapuloma demdepo. Adipalati, ya:tapo siyele yu Lod dla atlepame daya demdepo. Epame mo dlowe aiyalma dlalo oplamitapo ya: ma ya: Lod malamama siyele yu atlepame emale alisisi tlo demdepo. ⁷ Epedeme di ta:lamo hema isikimi bidulo solotamale koko halomha:ha:lowedeme poha:ha:sema. Epame dita palliwe mape isikimi bidulo solotamale tle popalimha:ha:sema. ⁸ Amasiyama dita ta:lamo hema isikimi Lodta solotamale koko tlo halomha:ha:lowedeme ha:ha:po. Epame dita palliye, di isikimi Lod yilo palliwepo. Epapedeme dita ta:lamo hema ha:ha:le dulu dla epo dita palliwe dla di isikimi Lod ya: opa depo ha:ha:lowepo.

⁹ Epapele koko tle Kelisotapo powale tle ma pasakalo dla sila:tiwapo, ya:tapo pasakalo ha:ha: so mate epo palli so mate yia: Lod depo hallowedeme.

¹⁰ Epedeme wua: adipalati wua: amkale mikadepe dle oplamiye batalimale oplami demdi? Epame wua: ma adipalati wua: amkale mikadepe dle oplamita malamaleye batalimana demdi? Adipalati, dita hapulomatapo God mila:pi tle koko gladlowedeme ha:ha:lepe. ¹¹ Ame adipalati, God yu bukata epo atlapo,

“Yao ikadepe, opa hapulomatapo na: hete sitali dla heodepame na:ye ikadepe Lodpo demyelepe.”

¹² Epedeme dita hapuloma hatlope hatlope dletapo diskamu di kokoye God dla bobotimatimyelepe.

**Wa:ta dlowe alisisi dlowe koko dla wa:
amkale batalimale dla semtamiya**

¹³ Epapedeme wua: amkadulo mikadepe dle soye allimha:ha:miya. Epame wua: amkale mikadepe dle oplamita batalimale dulu dla tullala depame

wua:tapo ya:ta kustamtame teyuluwe alisisi some ha:ha:miya. ¹⁴Epedeme Lod Yesuta na: watle me-imuwapo, dlowe alisisi hapuloma dloweye aiyalma hale hawa ikadepe. Amasiyama epapele tlope oplami haleta atlemama, “Dlowe alisisi opi dlowe aiyalma,” dlepiye, ya: ka:dena, dlowe alisisi e podlalo mepo aiyalma depo halloweye. ¹⁵Epapele dulu dla wua:ta alisisi dlomha:ha: kokotapo wua: amkale mikadepe dle oplami dla upiyele hapimha:ha:lepiye, wua: oplami eye pobokotiyapo malamha:ha:sema. Epapedeme wua:ta alisisi hapuloma dlomha:ha: kokotapo wua: amkaleye batalimiya. Adipalati, Kelisotapo ya: yilo mo-pouwapo. ¹⁶Epedeme wua:ye wolomape. Wu:ta dlowe alisisi hapuloma dlomha:ha: koko tle opa opitapo ka:dle yuye batalimana dlala. ¹⁷Adipalati, God ya: mo koko dla daya dlowe mate epo yú dlowe mateta koko pato pohalasema. Amasiyama Hela:dle Sokota itiyamale tle God mila:pi tle ullu pa:po ha:ha:lowe koko mate epo yimkadulo mate sadepo ha:ha:lowe koko mate epo siyele dulu dla ha:ha:lowe koko mateta koko pato halapo. ¹⁸Epedeme oplami antapo Keliso dla salladepo sela:mama ipapele koko dulu dla hallepiye, Godtapo oplami edla siyemhalapo. Epame opa opi mape ya: watle ka:depo hallalo oplami demha:ha:lepe.

¹⁹Epapedeme di sadle hampulalo koko tlo halomolowedeme totamha:ha:lowa. Epame di amkadulota mikadepe dle dulu dla itiyamale mate ha:ha:lepo depame asiyama gade asiyama gade demha:ha:lowa. ²⁰Epedeme wua:ta dlowe alisisi dlomde kokotapo God okoye batalima de demiya. Dlowe alisisi hapulomaye ka:dlepo. Epapele tlope wua:ta dlowe alisisi adi dlati wua: amkale mikadepe dle oplami dla upiyele hamimdi, wua: ya: yilo epapele alisisi dlomha:ha:miya. ²¹Epapedeme wua: aliya mo dlowe koko mate epo wain yú dlowe koko mate epame koko opi halomolowe mateta wua: amkale mikadepe dle oplamiye batalimale koko dla semtullala depame epapele kokoye ya: mila:pi tle halomha:ha:miya.

²²Epapele dulu dla wa:ta malamalepo dlowe alisisi hapuloma dloweye ka:pi dlepiye, ka:dena, me-demhalane. Amasiyama wa:ta malamalepo dlowe alisisi opi dlowe tlo pase ka:pi dlepiye, wa: isikimi wa:ta ka:dena dle alisisi tlo demhalane. Koko dapiyamte dulu hema wa:ta koko adi tlo mikadepe dema; wa: metlo God mila:pi tle kokata hamame halane. Epedeme oplami antapo ya:ta koko halomhalaye pobatalimale koko depo malamelepiye, ya: siyelowe ka:pi. ²³Amasiyama poka:dena, oplamitapo malamale tatlamale mate polomama dlowe alisisi hale dloweye. Epapelepiye, Godtapo ya: watle batalimale koko hama dlepe. Adipalati, ya:tapo mikadepe demama koko e pohasema. Epedeme wa:tapo batalimale koko dlalo kokoye ma metlo wa:ta halepiye, wa: batalimale kokoye ma-hapo.

Yimkadulo koko tlo sikemte malamha:ha:iya

15 ¹Epedeme ka:dena, mikadepe dle dulu dla kokalepo ha:ha:lalo so ditapo mikadepe dle pase kokalle so gadloweye. Epame diskamu

dia: tlo malapame koko pohalomha:ha:lowa. ²Amasiyama di diamkadulo tlo sikemte malapame yia:ta mikadepe dle dulu dla kokalepo ha:ha:lepo depame yia:ta solotamale koko tlo dolumha:ha:lowepo. ³Adipalati, Keliso mape God yu bukata atla yu e dolumama meyelo ya:ta solotamale kokoye po-ala:msela:na. Ame adipalati, yuta epo atlapo,

“Opa anawolotapo wa: dla putlomha:ha:ma,
yia: mape na: dla putlomha:ha:mama apopo,” depo.

⁴Epedeme koko hapulomaye God yu buka dla mo-powataliya hatitimuwapo, di imhalemama di gadlalo hallepodepame. Epapele koko tle di saddle mate ha:ha:mama Godtapo di wadle pasakalo hamilowe dla dalemha:ha:mama omha:ha:lowepo.

⁵⁻⁶Epedeme mikadepe dle dulu dla kokalepo hallowe koko mate ya:mkale gadlowe koko mateye God tle dia: dla puapo. Epapedeme na: inoma sumale yu himima, wua:tapo Yesu Keliso koko natipo dolumama wua: dulu dla woloma malamale hatlope dle kokota ellepo depame. Epame wua:ta hapuloma yimkatatapo di Lod Yesu Keliso ya: A God hi di dla ta:demha:ha:lepo depame.

Ka:dle yuye Yu so mate epo po-Yu so mate dla elapo

⁷Epedeme Kelisotapo wua: hohomuwaye, wua: ma epammama wua: amkaduloye hohomha:ha:iya. Wua:ta epamha:ha:lepiye, opatapo koko eye natipame God hi di dla ta:dlepe. ⁸Epapedeme na: wua: dla atlema, Kelisotapo Yu so yilo salladle oko halalo oplami haluwapo, ya:tapo Godta yia: mamadulo mate yu itiyapo hatitimale kokoye ikadepe dlowedeme.

⁹Epame po-Yu sotapo Godta yia: wadle bokotiyapo malamale himili koko dla ya: hi di dla ta:dlepo depame. Adipalati, God yu bukata epo atlapo,

“Epedeme na:tapo po-Yu so dulu dla halemama wa: hi di dla ta:demhallowepo.

Epame sala dodolumhalemama wa: hi tlo di dla ta:demhallowepo.”

¹⁰Epame God yu bukata ma epo atlapo,

“Po-Yu so wua; wua: Yu so mate yimkata hatlo godepame sisiyeiya.”

¹¹Epame God yu bukatapo ma epo atlapo,

“Po-Yu so wua; wua: God hi di dla ta:demama sisiyeiya.

Epame siyele sala dodolalimama ya: hi di dla ta:diya.”

¹²Epame Aisayata ma epo atlapo,

“Dokopala oplamitapo Yesi^b ya: asiya dulu tle pulupe,
ya:tapo po-Yu soye dokopala depo hallowedeme.

Epame po-Yu sotapo ya: tle pasakalo gadle halowedeme dalemha:ha:mama omha:ha:lepe.”

^b 15:12 Oplami Yesi iye, dokopala oplami Deibidi ya: apo.

¹³Epedeme na: inoma sumale yu himima, wua: dla pasakalo hamilalo Godtapo wua:ye sadle mate epo siyele mateta poposatilipo mellepo depame. Epame Hela:dle Sokota itiyamale tle wua:tapo Godta wua: dla pasakalo hamilowe dla dalemha:ha:mama omha:ha:lali wua: dla siyele elatapo pasatamama alowamelepe.

Polo ya: oko meyelo atlale

¹⁴Epapedeme mikadepe dle so namkadulo, na: mikadepe dema, ka:ka:dle kokotapo wua: dulu dla mo-poposatilipo ha:ha:po. Epame na: ma mikadepe dema, wua:ta Keliso kokoye malastapame ma yimkadulo gadle yu mate asiyama gade asiyama gade demha:ha:loweye mo-wua:malamana. ¹⁵Amasiyama epapele tlope wua:ta koko hapuloma iye welilala depame na:tapo yu ilimale dulu hema haliyamale dla botomastepo ilimuwapo. ¹⁶Adipalati, Godta bokotiyapo malamale tle na:ye Keliso ya: oko oplami duwapo, na:tapo po-Yu so dulu dla oko halepo depame. Epedeme na:ye God ka: epo opa ka: duka dla hallalo some salladle oko hamama ya: tle puale ka:dle yu atlamsela:po. Epame po-Yu soye na:tapo ullu ka:depo pamalalo alisisi epapele some God watle hapima, yia:tapo Hela:dle Sokota itiyamale tle ullu pa:po ha:ha:mama God dla siyele hamilipo depame.

¹⁷Epedeme na: Kelisotapo na:ta God oko hamhallati na: tle oko hamhaluwa tlo di dla hamhetama. ¹⁸Epapele dulu dla na: koko opi tlo di dla hamhetlowe posolotamasema. Amasiyama na: hatlo Kelisotapo na: dulu dla oko hamama na:ta atlamale tle epo na:ta koko halë tle po-Yu sotapo God dla mikadepe duwa koko tlo di dla hamhetama. ¹⁹Epame yia:tapo na:ta Hela:dle Sokota itiyamale tle ulugiyemale koko patoto halomhaluwa natipame God dla mikadepe duwapo. Epedeme na:ye ka:dle yu atlamsela:mama Yelusalem tle kotiyapame tame Ilulikon mo dla tame guduwapo. ²⁰Epapedeme na: sikemte solotamduwa, Keliso koko podallalo wekele so mo dla tame ka:dle yu atlamsela:lowedeme. Epammama na: posolotamdena, ya:mkaleta oko mo-kotiyamale tama di dla ma na:ta oko haloweye. ²¹Adipalati, God yu bukata epo atlapo,

“Ya: koko pomalamalalo wekele sotapo ya: kokoye malamelepe.

Epame ya: koko podallalo wekele sotapo ya: koko dalepame malastlepe.”

**Polota Loum mo dla ha:ha:lalo mikadepe dle so
natila tlowedeme solotamale himili**

²²Epapele koko tle na:tapo ka:dle yu atlamsela:mama wua:ta hala dla tloweye alila ponatimdena. ²³Amasiyama na:ta mo hema oko haloweye moguduwapo. Epedeme na: ma puame wua: natilowe solotama. Adipalati, na: mo-powataliya wua: natilowe solotamale himhaluwapo. ²⁴Epapedeme

na: Spein mo dla tamama Loum mo edla tuwame wua: natilowepo. Epapele dulu dla na:ta wua: mate halepo gudepo ma Spein mo dla tlowedeme apalati wua: na:ye gadle himilipe. ²⁵Amasiyama na: wua: hala dla tlowe aseka me-hallati Yelusalem dla mikadepe dle so watle namkale dle alisisi tatile hamtlowama. ²⁶Adipalati, mikadepe dle so Makedoniya dla ha:ha:lalo so mate epo Akaya dla ha:ha:lalo so mateta Yelusalem dla alisisi pa:talo mikadepe dle so gadlowedeme mani kolupo na: watle hamiwa, na:ta yia: dla hamtelepo depame. ²⁷Epapedeme Makedoniya so mate epo Akaya so mateta sisiyele mate mani i kolumuwapo. Adipalati, Yu so tle pasakalo gadlowe kokota yia: dla mo-puwapo. Epedeme yia: ma asiyama alisisi mate Yelusalem mikadepe dle so gadlowe ka:pi duwapo. ²⁸Epapedeme na:tapo yia:ta namkale dle alisisi kolumale hamtame Yelusalem so dla hapipame ma Spein mo dla tamama duka dla tuwame wua: natilowepo. ²⁹Epedeme na:malamana, na:ta wua:ta hala dla pulupiye, Kelisota di watle siyele pato hamilipe.

³⁰Epapedeme mikadepe dle so namkadulo, Lod Yesu Keliso hi tle epo Sokota bokotiyapo malamale tle na: wua: dla otele pato himima, wua:tapo na: oko ipiye gademama na: yilo God dla inoma sumale himha:ha:lepo depame. ³¹Epame wua: inoma sumale yu hale himiya, Yesu dla pomikadepe dle so Yudiya mo dla ha:ha:lalotapo na:ye hampame wotiyalle hamilala depame. Epame ma inoma sumale yu hale himiya, na:tapo mani Yelusalem dla hamtlati mikadepe dle so Yelusalem dla ha:ha:lalotapo mani e natipame sisiyelepo depame. ³²Epapedeme Godta solotamelepiye, na:tapo siyele mate wua: hala dla tlowepo. Epame dita yimkatatapo asiyama gade asiyama gade demama hedle ka:dle halowepo. ³³Epedeme sadle hamilalo Godtapo wua: mate hallepe. Eye ikadepepo.

Polota mikadepe dle so dla namkale dle yu atiale

16 ¹Epedeme di nana Poibeye Kenekeleya mo dla dikon oko ka:pi halalo a:yapo. ²Epapedeme a:ya itapo wua: hala dla pulati wua:tapo ya:ye Lod hi tle namkale dle mate sepame ya:ye woloma ka:pi gadlepe. Adipalati, ya:tapo na:ye koko opi tle woloma ka:pi gademhalemama opa opi mape ya:ta sikemte gademhalemduwapo.

³Epame na:ta namkale dle yuye Plisila dla epo ya:wolali Akwila dla hamiya. Adipalati, yia: Yesu Keliso dulu dla na: oko ipi halalo sopo. ⁴Epame yia:tapo na: pasakalo tlo sikemte ka:pi gademama asiyama yia: tlo wotiyalle hamama mo-palila yakomuwapo. Epapele koko tle na:tapo namkadulo po-Yu so mikadepe dle so mate yia:ye sikemte malama. ⁵Epame yia: aya dulu dla inoma sumha:ha:lalo so dla ma na:ta namkale dle yuye hamiya.

Epame namkale ikadepe Epainetus dla mape na:ta namkale dle yu hamiya. Adipalati, ya:tapo Asiya mo pato dulu dla ya: tatile Keliso dla mikadepe duwapo.

⁶Epame Meli dla mape na:ta namkale dle yuye hamiya. Adipalati, ya:tapo wua: yilo oko pato hauwapo.

⁷Epame na: asiyadulo Andlonikus mate epo Yuniyas mate dla mape na:ta namkale dle yuye hamiya. Adipalati, yia:tapo na: mate yimkata amtuwale aya dulu dla ha:ha:uwapo. Epapele dulu dla Taiya dle so opa dulu dla opa dapiyamte iwoloye sikemte i-itiyamale sopo. Yia:ye na: ala Keliso dla pomikadepe dlalo hallati yia: tattle mo-powataliya mikadepe depo ha:ha:uwapo.

⁸Epame namkale Lod dulu dla hallalo Ampiliyatus dla mape na:ta namkale dle yuye hamiya.

⁹Epame diamkale Lod dulu dla oko halalo oplami hale Ulbanus dla mape na:ta namkale dle yuye hamiya. Epo namkale Stakus dla mape na:ta namkale dle yuye hamiya.

¹⁰Epame Apeles dla mape na:ta namkale dle yuye hamiya. Ya:tapo wotiyalle dulu medla halemama Keliso dla me-mikadepe depo haluwapo. Epame Alistobulus dla epo ya: aya dulu dla ha:ha:lalo so mate dla na:ta namkale dle yuye hamiya.

¹¹Epame na: asiya dulu dla hallalo oplami hale Helodiyon dla mape na:ta namkale dle yuye hamiya. Epo mikadepe dle so Nalkisus aya dla ha:ha:lalo so dla mape na:ta namkale dle yuye hamiya.

¹²Epame a:ya Tlupaina mate epo ya:la Tluposa mate dla na:ta namkale dle yu mape hamiya. Adipalati, wola: iwolotapo Lod yilo oko pato hamha:ha:po. Epo namkale ikadepe Pelsis dla mape na:ta namkale dle yuye hamiya. Adipalati, ya: mape Lod dulu dla oko ka:pi halalo a:yapo.

¹³Epame Lod dulu dla hallalo oplami Lupus dla mape na:ta namkale dle yuye hamiya. Epo ya: wai dla mape na:ta namkale dle yuye hamiya. Adipalati, ya:tapo na: wai epapele some halemama na:ye woloma ka:pi gademhaluwapo.

¹⁴Epame na:ta namkale dle yuye Asunklitus dla epo Plegon dla epo Helmes dla epo Patlobas dla epo Helmas dla epame mikadepe dle so opi yia: mate yimkata hatlope demde dla hamiya.

¹⁵Epame Pilologus mate dla epo Yuliya mate dla epo Neleus mate dla epo yotumala mate dla epo Olumpas mate dla epame mikadepe dle so yia: mate hatlope demde mate dla na:ta namkale dle yu mape hamiya.

¹⁶Epedeme wua: Keliso dulu dla ha:ha:mama namkale dle mate asiyama huhulama asiyama huhulama demha:ha:iya. Epame mo hema ha:ha:lalo mikadepe dle so hapulomatapo yia:ta namkale dle yuye wua: dla hamima.

Polota mosukulu molo atlale yu hamili

¹⁷Epapedeme mikadepe dle so namkadulo, wua: dulu dla opa duka hukullalo so mate epo mikadepe dle soye alikili a:ma elemtlalo

so mateye woloma natiya. Adipalati, yia:tapo ikadepe koko wua:ta dalepame hamuwa kokoye yia: e podolumasemde. Epedeme yia: tle alikili a:ma potame ha:ha:iya. ¹⁸Adipalati, epapele sotapo Lodta solotamale kokoye podolumha:ha:sema. Amasiyama miyelo solotamale koko tlo dolumha:ha:mama yu sikemte o-opalli koko tle koko yeitamale soye batalimale koko dla elemtuluma:ha:po.

¹⁹Epedeme mikadepe dle so opa hapuloma ma-yia:malamana, wua:tapo Lod dla sikemte mikadepe depame salladepo siyama kokoye. Epedeme epapele kokotapo na: dla siyele hamimhalapo. Amasiyama na: sikemte solotama, wua:ta isikimi ka:ka:dle koko siyapo halomolowe tlo malastepo ha:ha:mama asiyama ma batalimale koko halomolowe dla kokotipo ha:ha:lepo depame.

²⁰Epame sadle hampulalo Godtapo Saitenta itiyamaleye yumpame Saitenye wua: hete sitali dla himilipe. Epedeme di Lod Yesuta bokotiyapo malamaletapo wua:ta hapuloma mate dla hallepe.

Polo ya:mkadulota Loum so dla namkale dle yu hamili

²¹Na: mate oko halalo oplami Timoti mape ya:ta namkale dle yuye wua: watle hamima. Epo na: asiyadulo Lukiyus mate epo Yason mate epo Sosipate mateta yia:ta namkale dle yu mape wua: watle hamima.

²²Epedeme Polo ya: yu ilimalalo oplamiye Teltiyus na:po. Na: mape Lod hi tle wua: dla namkale dle yuye hamima.

²³Epame na:ta hallalo aya ya: a Gaiyus mape ya:ta namkale dle yuye wua: watle hamima. Aya dulu hema mikadepe dle so hapulomatapo yimkata inoma sumdepo. Epame Kolin mo pato dulu dla mani ompollalo oplami Elastus mape ya:ta namkale dle yuye wua: watle hamima. Epo di ei Kuwaltus mape ya:ta namkale dle yuye wua: watle hamima.

²⁴Epedeme di Lod Yesu Kelisota bokotiyapo malamaletapo wua:ta hapuloma mate dla hallepe.

Polota yu mosukulu atlale

²⁵Epedeme God hi di dla ta:diya. Adipalati, ya:tapo na:ta atlamsela: ka:dle yu itle wua:ta mikadepe dle itiyamale hamiloweye ala:na. Ka:dle yu Yesu Keliso koko iye ka:yapa mo-powataliya hemele hatiyomeleme eluwapo. ²⁶Amasiyama kokó halepo hallalo Godtapo yu hamiwapo, ka:dle yu iye God tle yu hapame molo atlamalalo sotapo buka dla ilimelepo depame. Epapuwa koko tle watapo ka:dle yuta ma-haliyamale dla botomastepo elapo, opa hapulomatapo Keliso dla mikadepe depame ya: yu dla salladepo siyamelepo depame. ²⁷Epedeme Yesu Keliso tle ka:depo dinapolalo God hatlo ya: hi tlo alila hapuloma di dla ta:demha:ha:iya. Eye ikadepepo.